



# PASA BILIS!

## KALMAS!

Taliwala sa mga detatsment sa kaaway

Basaha sa p. 14 ug 15



HULYO 2018



ANG PANGMASANG MANTALAN SA HABAGATANG MINDANAO



TUIG 19 BLG. 1

# BERDUGONG DUTERTE PALAGPUTON!



Gikan sa Ang Bayan

## Walay puas nga atake batuk sa hut-ong mamumuo

DAVAO CITY—ANG PAGDAKOP ug pagbilanggo sa 10 ka mamumuo sa Coca-Cola FEMSA sa Davao City nagpakita lamang sa kamatuoran nga padayong prayoridad sa kasamtangang rehimen—labaw na sa pamilyang Duterte—ang pagpanalipod sa interes sa kapitalista bisan pa mayatakan ang batakang katungod sa naghagong katawhan.

Niadtong Abril 2, gibungkag sa kapulisan sa syudad ang malinawong piket sa Kilusang Manggagawa ng Coca-Cola-Kilusang Mayo Uno (KIMACO-KMU) human gipanangtang ang 72 ka mamumuo nga mga membro sa unyon. Sulod sa 4 ka

adlaw, gibalhog sa presohan ang gipang-arestong mamumuo bisan pa man walay klarong kaso nga gipasang-at batuk kanila.

Matud sa gipanangtang nga mga mamumuo, gilikayan sa Coca-Cola ang direktang responsibilidad niini ngadto sa mga mamumuo pinaagi sa pagtukod og usa ka *labor-contracting agency* nga maoy tigdawat ug tigsuhol og mga trabahante alang sa operasyon sa kompanya. Daghan sa mga mamumuo halos 9 ka tuig nang nagtrabaho ug angayan nang himuong regular subay sa balaod. Sa kasamtangan, anaa sa 40% lang sa mga mamumuo dinhi ang regular.

Ginabayran lang sa langyawng kompanya ang mga kontraktwal og P340 matag adlaw, nga wala pay ka-

SUNDI SA P. 4

### ILALOM SA REHIMENG US-DUTERTE

**663,000**

nawala nga trabaho niadtong 2017, pinakadaghan sulod sa milabayng 20 ka tuig

**P340**

matag adlaw dili makabuhi nga suholan atubangan sa P1,100/adlaw nga panginahanglan sa Davao region



PAKIGBISOG ALANG SA TINUOD NGA REFORMANG AGRARYO. Kapin 500 ka mga mag-uuma kinsa giling "agrarian reform beneficiaries" ilalom sa CARP sa reaksyunaryong gobyerno ang nagprotesta sa Davao del Norte sukad niaging tuig. Basaha ang hinungdan sa ilang pakigbisog sa pahina 17.



**GISAYANG NGA OPORTUNIDAD.** Niadtong unang bahin sa Hulyo, gipagula sa Negotiating Panel sa National Democratic Front of the Philippines (NDFP) ang 4 ka dokumentong pirmado nila ug sa Peace Panel sa Government of the Republic of the Philippines human yanong gikansela ni GRP Pres. Rodrigo Duterte ang naka-iskedyul nga pagpadayon sa pormal nga negosasyon niadtong Hunyo 28. Ang mga dokumento mao ang:

- (1) **Stand Down Agreement**, usa ka pasunang hunong-buto tali sa NPA ug armadong pwersa sa GRP;
- (2) **Guidelines and Procedures**

towards an Interim Peace Agreement and the Resumption of Talks, ang giya ug pamaagi sa pagpadayon sa negosasyon ug pagkab-ot og usa ka temporaryong kasabutan alang sa kalinaw;

(3) **Initialed Interim Peace Agreement**, ang ginisyalan nga kasabutan alang sa kalinaw; ug

(4) **NDFP Proposed Draft of the Amnesty Proclamation** alang sa mga bilanggong pulitikal nga gihatag ngadto sa GRP ug sa Royal Norwegian Government, ang Third Party Facilitator sa negosasyon.

Matud ni Prof. Jose Ma. Sison, chief political consultant sa NDFP, gisayangan ni Duterte ang oportunidad nga magpakaaron-ingnong alang sa kalinaw. "Himulag na siya ug hinog na aron palagputon sa lapad nga nagkahiusang prente." ★

## NPA, NDFP sa SMR gisaway ang localized peace talks ni Duterte

ATOL SA pagbuhi sa bihag sa gubat nga si PNP Police Inspector Menardo N. Cui niadtong Hulyo 27, gisaway ni Rigoberto F. Sanchez, tigpamaba sa Regional Operations Command sa NPA-SMR, ang ginaduso nga *localized peace talks*, kinsa nagkanayong moalagad lang kini sa pasipikasyon ug kampanyang pagpasurrender sa rehimeng US-Duterte.

"Lig-ong nagbarog ang NPA nga dili mahimong kabahin sa lokal nga negosasyong pangkalinaw nga wala nag-asdang sa panawagan sa katawhan alang sa tinuod nga repormang agraryo ug nasud-nong industriyalisasyon," matud ni Sanchez.

Sa pikas bahin, matud ni Rubi del Mundo sa NDFP-SMR, wala laing tumong ang *localized peace talk* kun dili "sulayan nga tabonan ang kadaot sa balaod militar sa Mindanao ug ang nagkagrabeng pagbanaw sa dugo bunga sa Oplan Kapayapaan nga nakaapekto sa minilyon ka sibilyan sa tibuok nasud."

Ang *localized peace talk* nagtumong nga pulihan ang hinabing pangkalinaw nga ginapahigayon sa langyawng nasud tali sa NDFP nga anaa sa Norway ug sa reaksyunaryong gobyerno sa Pilipinas. Sumala pa sa administrasyong Duterte, ang *localized peace talk* ipahigayon sa lain-laing *local government unit* sulod sa nasud.

"Ang ideya sa hisgutanang kalinaw nga 'nasud-nong gidumala, sentralisadong gimandoan ug lokalisadong gipadagan ug gipatuman' usa lamang ka pagtabon sa kamatuoran nga dili sukad seryoso si Duterte nga tubagon ang ugat-hinungdan sa armadong pagsukol sa katawhang Pilipino."

Sa Southern Mindanao, partikular sa Davao City, pila ka higayon nang gibalibaran sa pwersa sa NPA ang tanang "imbitasyon" alang sa *localized peace talk*.

Gipaklaro usab ni del Mundo kung kang kinsang interes nag-alagad ang pagduso ni Duterte sa *localized peace talk*. "Gina-aghat sa pagkatinuod ni Duterte ang korap nga kinaiya sa sama niyang mga lokal nga burukrata kapitalista pinaagi sa pagdasig kanila nga buntogon ang mga giabot ug daan-nang gisabotang mga giya ug makinarya sa negosasyon sa milabayng 25 ka tuig."

Dugang pa ni del Mundo, tumong ni Duterte nga ihimulag ang daghang mga lokal ug nasud-nong pulitiko kinsa nagasuporta sa negosasyon tali sa GRP ug NDFP ug ihulagway sila nga mga kontra-kalinaw o simpatisador sa mga Komunista.

"Labot pa, siguradong gamiton sa rehimeng US-Duterte ang ginaduso nga *local peace talk* aron himuong gatasan sa dugang korapsyon sa mga gipaboran niining mga reaksyunaryong pulitiko ug mga opisyal sa AFP ug PNP." ★



APDEYT SA PEACE TALKS



PARA SA usa ka desperadong diktador nga walay puas ang pagarpar nga alang siya sa kalinaw, subling gisumpo ni GRP Pres. Rodrigo Duterte ang hinabing pangkalinaw niadtong Hunyo, taliwala sa upat ka higayong "backchannel talk" nga gipahigayon sa iyang *peace panel* ug sa NDFP *panel* ug mibunga og 4 ka dokumentong mopaabante sa negosasyon.

Dili kini ang unang pag-atras-abante ni Duterte sa negosasyon. Mahinumdomang sukad Mayo 2017, tulo ka higayon niyang gipaundang ang negosasyon, gipagula ang Proclamation No. 360 niadtong Nobyembre 2017 nga pormal nga nagtapos sa hinabing pangkalinaw, ug gitudlo ang CPP-NPA-NDFP isip mga teroristang grupo.

### Pleksibilidad sa NDFP

Bisan pa man niini, gipakita sa NDFP ang pleksibilidad isip pag-ila sa kaylap nga panawagan sa katawhan nga ipadayon ang negosasyon. Wala sukad kini nagtakda og kondisyon, gawas sa pagsingil sa daang mga kasabotan sama sa pagbuhi sa mga bilanggong pulitikal. Gani, andam kining hangyuon ang CPP ug NPA nga magpakanaog og *stand down order* ug mouyon sa usa ka *bilateral ceasefire agreement* isip kabahin sa mga kasabutan lakip na ang Comprehensive Agreement on Socio-Economic Reforms (CASER).

### Tinuod nga hinungdan sa kanselasyon

Bakak ang ginaingon ni Duterte nga gusto niyang konsultahon una ang publiko ayha ipadayon ang negosasyon. Sa pagkatinuod, ang iyang desisyon nga undangon ang hinabing pangkalinaw bunga sa konsultasyon tali sa Armed Forces of the Philippines ug sa uban pang mga tigsabotahe sa kalinaw sama ni Department of National Defense Sec. Delfin Lorenzana.

Matud pa sa Communist Party of the Philippines, nangambisyon ang AFP nga puohon ang NPA ayha ma-human ang tuig 2018. Subay niini, paspas nga nagrekut ang AFP og dugang 15,000 ka tropa ug gideploy ang dul-an 100 ka batalyon sa lain-laing dapit sa nasud diin 65% anaa sa Mindanao. Sa mosunod nga mga bulan, gibana-banang kapin P20-30 bilyones ang gastuhon sa AFP alang sa gyerang pagpanumpo batuk sa NPA ug uban pang armadong grupo sa mga Moro nga walay

# Gyera inay nga makatarunganong kalinaw



GRP Pres. Rodrigo Duterte, Hulyo 6, 2018

Mag-gyera ta... Milanat na og 50 ka tuig ang gubat. Karon, sugdan nato ang bag-ong 50 ka tuig nga gubat.

**PASISMO SA REHIMENG US-DUTERTE.** Gipasundayag sa mga aktibista ang dagway sa implementasyon sa balaod militar sa Mindanao.

laing gibiktima kun dili ang mga dili-armadong sibilyan, kaaway ni Duterte sa pulitika ug mga aktibista.

Bag-ohay lang, giduso sa administrasyong Duterte ang pagpahigayon sa *localized peace talks* isip hulip sa negosasyong pangkalinaw tali sa GRP ug NDFP.

Sa laktod, gituyo ni Duterte nga isabotahe ang negosasyon tungod wala siyay laing tumong kun dili ang hingpit nga pagpuo sa armadong pagsukol sa katawhan.

### Kalauman sa hinabing pangkalinaw

Nagbarog ang NDFP nga mas gikinahanglan ni Duterte ang hinabing pangkalinaw sa pagkakaron, labaw na nga sulod sa 2 lang ka tuig, himulag ug gikasilagan na siya sa katawhang Pilipino sa iyang pagpili sa labihan ka mahal nga gyera inay nga makatarunganong kalinaw.

Sumala pa ni Prof. Sison, kun mao kini ang gusto sa rehimeng US-Duterte, "walay laing kapilian ang rebolusyonaryong pwersa ug ang katawhang Pilipino kun dili ang hingpit nga paglunsad og gubat sa katawhan alang sa nasudnon ug katilingbanong kalingkawasan."

Alang sa CPP, daku ang posibilidad nga dili makumpleto ni Duterte ang iyang 6-ka-tuig nga termino ug mapalagpot siya sa Malacañang pinaagi sa pag-ulbo sa kontra-pasistang mga protesta o lain pa.

Gipanawagan sa CPP ang tanang rebolusyonaryo, progresibo ug demokratikong pwersa nga himuon ang tanan aron pakusgon ug palapdon ang nagkahiusang prente ug hiusahon ang tanang sektor nga nag-ilaid ilalom sa rehimeng Duterte ug palihukon ang minilyon nga katawhang Pilipino aron suklan ang burukratikong pagpangawkaw, pagpakaitoy ug pasismo ni Duterte ug palagputon ang iyang malupigong paghari. ★

# Dagkung kompanya sa mina, sagingan gisilotan sa BHB

**DUHA KA aksyong pagsilot ang gilunsad sa mga yunit sa BHB sa rehiyon niining Enero batuk sa dagku ug langyawng kompanya sa mina ug plantasyon sa sagingan kinsa nagpahimulos sa mga mamumuo ug mag-uuma samtang pada-yong ginadaot ang kinaiyahan.**

Gireyd sa mga Pulang manggugubat sa ComVal-Davao Gulf Sub-Regional Command ang RAM Aggregates, Inc., usa ka kompanya nga nagamina og nickel sa Brgy. Puntalino, Banay-banay, Davao Oriental niadtong Enero 4.


Nakumpiska sa BHB ang usa (1) ka Garand rifle nga dunay *sniper's scope*, usa (1) ka M79 *grenade launcher*, duha (2) ka *shotgun*, usa (1) ka kalibre 45 nga pistola, usa (1) ka kalibre .357 nga pistola, gatusan ka *round* sa lainlaing bala ug uban pang himang militar. Gisunog usab ang mga ekwipo sa kompanya, lakip ang 6 ka *backhoe*, usa ka *bulldozer* ug usa ka *dump truck*.

Sa Davao City, gisilotan sa 1st Pulang Bagani Battalion ang langyawng Sumitomo Fruits Corp. (SUMIFRU) ug Highland Banana Corporation nga gipanag-iyahan sa mga Ayala sa Sitio

Tigon ug Sitio Sicao, Brgy. Tamayong, Calinan District. Tulo ka *boom truck sprayer* ang dungan-dungang gidabdaban ug gihulog sa pangpang, niadtong Enero 13.

Matud ni Rubi del Mundo, tigpamaba sa NDFP-Southern Mindanao, ang maong mga aksyon kabahin sa palisiya sa rebolusyonaryong kalihukan nga silotan ang mga langyaw ug dagkung kompanya sa mga burgeskomprador kinsa padayong gawasnon nga nagapahamtang og kadaot sa kinaiyahan ug nagapahimulos sa mga mag-uuma ug mamumuo.

Ang SUMIFRU ug Highland mga iladong mapahimuslanon sa mga mamumuo pinaagi sa paghatag og halos-dili makabuhi nga suholan, pagpatrabaho ilalom sa dili tawhanong mga kondisyon, pagbungkag og unyon ug uban pang mga malupigong pamaagi sa pamuo. Dugang pa, padayon silang nagaga-



**AYOS!** Luwas nga gipapauli sa mga Pulang manggugubat ang mga mamumuo sa plantasyon sa sagingan nga gipanag-iyahan sa SUMIFRU ug Highlands human sa malampusong paglunsad sa aksyong silot batuk sa duha ka kompanya niadtong Enero 13, 2018.

mit og makahilo nga mga kemikal nga pestidyo ug abono sa ilang mga *boom truck sprayer*. Matud sa mga mamumuo, kanunay silang bulnerable sa mga makadaot nga kemikal nga gina-ispray sa mga *boom truck*.

Sa pikas bahin, nag-eksport ang RAM Aggregates Inc. og nickel ngadto sa mga langyawng kompanya sa gawas sa nasud samtang nagsuhol og mumho ngadto sa ilang mga minero ug pada-yong nagguba sa kinaiyahan sa lugar.

Dugang pa ni del Mundo, "Kun wala

ang mga aksyong pagsilot nga ginapahamtang sa BHB, padayong mahimong gatasan sa imperyalistang kahakog ang katawhang Pilipino ug ang rekursu sa nasud, labaw na sa pinugos nga maniobra sa rehimeng US-Duterte nga ibaligya ang atong nasudnon ug ekonomikanhong soberanya pinaagi sa pederalismo ug Charter Change...

... Niining panahon sa pagpanglupig ug pagdaug-daog, nagsalig ang masa sa BHB aron panalipdan ang ilang mga demokratikong interes." ★

## Sobra 700 aksyong militar gilunsad sa BHB sa Mindanao

**MOKABAT SA 2 ka aksyong militar matag adlaw ang gilunsad sa Bagong Hukbong Bayan sa Mindanao niadtong milabayng tuig isip tubag sa todo-gyera sa rehimeng US-Duterte.**

Lakip niini ang sobra 180 gikan sa North Eastern Mindanao Region, 131 gikan sa North Central Mindanao Region, kapin kon kulang 80 sa Western Mindanao Region, 219 sa Southern Mindanao Region ug sobra 100 sa Far South Mindanao Region. Dili moubos sa 266 ka armas ang nasakmit niining sobra 700 ka mga aksyon.

Anaa ang BHB sa 46 ka mga prenteng gerilya, kinsa naglihok sa sobra 2,500 ka baryo sulod sa 200 ka munisipyo sa 20 ka probinsya sa tibuok Mindanao.

Matud ni Ka Joaquin Jacinto, tigpamaba sa NDF-Mindanao, gihuptan sa mga yunit sa BHB ang abante ug opensibang postura sa pag-atubang sa nagsalimoang nga kampanyang militar sa AFP.

Isip resulta niini, nasustine sa BHB ang taas nga moral sa pag-alagad ug pagdepensa sa masa.

Kapin usab 2 ka batalyon ang nahigomag kaswalti sa armadong pwersa sa rehimeng Duterte (sobra 500 ang pa-

tay ug 200 ang samdan) samtang sobra 11 ka elemento sa AFP, PNP ug ilang paramilitar ang nahimong bihag sa gubat sa BHB.

**BALIK-LANTAW**  
**2017**


Dugang pa, pipila ka plantasyon ug mga kompanya kinsa grabehang nagpahimulos sa mga mamumuo, mag-uuma ug Lumad ug nagdaot sa kinaiyahan ang gipahamtangan og aksyong silot.

Sa pikas bahin, walay bisan usa ka yunit sa BHB ang napuo sa AFP atubangan sa paggamit sa kaaway og *air-strike*, mga *drone* ug dinugay nga operisyong mipokus sa pipila ka target.

Matud pa ni Jacinto, nadugangan pa ang ihap sa mga platun ug kompanya sa BHB kun itandi niadtong 2016 taliwala sa makanunayong *black propaganda*, mini nga mga *peace caravan* ug walay undang nga pagparada og mga peke nga mga nagsurender.

"Matag minuto, gisiguro sa mga yunit sa BHB ang kaandamon sa panagsangka, gigamit ang matag kahigayonan isip pagtulunan aron mapalambo ang estratehiya, mga taktika ug pamaagi sa pagpuo sa kaaway ug silotan ang mga lunodpatay nga mga kriminal sa rehimeng US-Duterte," panapos ni Jacinto. ★

## Sa bisan unsang gyera, kung masa imong kalaban, di gyud ka modaog—NPA POW Cui



**The NPA has the advantage because they are in the mass base, at the grassroots itself.**

KINI ANG pahimangno sa bihag-sagubat sa BHB nga si Police Inspector Menardo Nisperos Cui, PNP Badge No. 0-28281, kalabot sa ginalunsad nga kontrakatawhang Oplan Kapayapaan sa rehimeng US-Duterte.

Gibuhian si POW Cui sa 2nd Pulang Bagani Company niadtong Hulyo 27 sa Sityo Indawhong, Bry. Salaysay, Baguio District sa Davao City. Gidawat si POW Cui sa mga representante sa Exodus for Justice and Peace ug ni GRP Special Assistant to the President Christopher "Bong" Go.

Sa usa ka bidyo nga gipagula sa Pasabilis! niadtong Enero 12, gisaysay ni POW Cui nga sa kasamtangang gubat sibil, anaa sa bentaha ang mga Pulang manggugubat tungod anaa sila naglubog sa base mismo, dili sama sa mga tropa sa AFP nga ginabombahan ang mga komunidad sa masa panahon sa ilang mga operisyon.

Tan-awa ang tibuok niyang bidyo sa <https://www.youtube.com/watch?v=qBeyvL09EUA&pbjreload=10> o sa Facebook page nga @pasabilis. ★

# Nagkakusog nga kolektibo, maisugong pagsukol

ATUBANGAN SA inadlaw-adlaw nga atake sa ilang kinabuhi ug panginabuhian, nagpadayon ang nagkalapad nga pagsukol sa hut-ong mamumuo batuk sa kapitalistang pagpahimulos ug kriminal nga pagpasagad sa rehimeng US-Duterte.

Sa kasamtangan, naglunsad ang mga mamumuo sa 25 ka empresa sa tibuok nasud ug welga, kampuhan ug lain-laing porma sa hiniusang paglihok aron iprotesta ang nagpadayong kontraktwalisasyon, pagbungkag sa ilang mga unyon ug uban pang porma sa kapitalistang pagpahimulos ug alang sa nasudnong minimum nga suholan.

Pinakadako niining mga hiniusang-paglihok mao ang welga sa NutriAsia; piket sa Philippine Long Distance Telecommunications Company, Monde Nissin, ug sa CoreAsia; kampuhan sa Jollibee ug Slord Development Corp.; ug *sitdown-strike* sa Middleby. Apektado ang sobra 10,000 ka mga mamumuo sa maong mga paglihok.

Upat (4) niining mga protesta anaa sa mga plantasyon ug empresa sa Southern Mindanao, lakip ang Coke Femsa sa Davao City. Niaging tuig, 2,000 ka mga mamumuo ang nagpahigayon og usa ka semana nga *general strike* sa mga unyon sa plantasyon sa saging sa lain-laing munisipyo sa probinsya sa Compostela Valley.

## Makasaysayanong Adlaw sa Pamuo

Ang mga isyu kalabot sa seguridad sa panarbaho, makabuhing suholan, maa-yong kondisyon sa pagtrabaho ug pagtapos sa balaod militar ang gisinggit sa kapin 3,000 ka mga mamumuo nga nagmartsa atol sa Kalibutanhong Adlaw sa Pamuo niadtong Mayo 1 sa Davao City.

Giingong usa ka makasaysayanong

Mayo Uno ang maong pagsaulog tungod sa unang higayon sukad 1989, hiniusang nagtipon ang lain-laing grupo ug organisasyon sa pamuo aron panninglan si GRP Pres. Rodrigo Duterte sa iyang saad nga undangon na ang *end of contract* (endo) ug uban pang porma sa kontraktwalisasyon sa tibuok nasud.

Gisalmotan sa 3 ka dagkung pederasyon sa pamuo sa rehiyon ang maong paglihok—ang Kilusang Mayo Uno-Southern Mindanao, Partido ng Manggagawa-Nagkaisa ug SENTRO-Nagkaisa. Giduyogan sila sa mga mag-uuma, kabus sa syudad ug mga estudyante sa mga unibersidad sa dakbayan.

Human pila ka higayong gibabagan sa mga pulis ug militar samtang nagbyahe padulong sa Davao City, naghiusa ang kapin usa ka libo ka mamumuo gikan sa 8 ka unyon sa mga plantasyon sa Compostela Valley nga barikadahan ang *national highway* sa Nabunturan ug didto magpahigayon og protesta.

Sa maong adlaw, gitaho nga sobra 100,000 ka mamumuo ang nisalmot sa mga protesta sa lain-laing dapit sa nasud. Gisaulog usab nila ang ika-200 ka tuig nga adlawng natawhan sa bayani sa kalibutanhong kalihukang pamuo nga si Karl Marx.

Gawas sa paglunsad og mga ekonomikanhon ug pulitikanhong pakigbisog sulod sa ilang mga empresa, gihagit usab sa Partido Komunista ng Pilipinas ang mga mamumuo nga “padayong magtampo sa ilang kusog ug kadasig aron iaslang ang armadong pakigbisog pinaagi sa pagsampa sa Bagong Hukbong Bayan, aron palagputon ang representante sa nagharing hut-ong, ang rehimeng US-Duterte, ug sa katapusan, ang tibuok reaksyunaryong sistema.” ★



**WALAY KALIPAY SA COKE!** Mga gipangtangtang nga mga mamumuo sa Coca-Cola FEMSA sa Davao City atol sa ilang protesta ug pila ka oras ayha sila iligal nga gipangdakop sa mando ni Mayor Sara Duterte.

## WALAY PUAS NGA ATAKE... GIKAN SA P. 1

tunga sa kapin P1,100 matag adlaw nga abereyds nga panginahanglan sa matag pamilya. Daghang higayon silang ginapatrabaho og sobra 8 ka oras nga walay *overtime pay* o ubang benepisyo.

### Ekonomikanhon, pulitikanhon nga atake

Sa Southern Mindanao, ang kahimtang sa mga mamumuo sa Coca-Cola FEMSA nahitabo usab sa mga mamumuo sa Holcim Philippines sa Davao City, diin 70% kanila pulos kontraktwal. Sa mga plantasyon ug planta sa langyawng DOLE Stanfilco sa ComVal, kapin 2,900 sa 3,000 ka mamumuo niini ang mga kontraktwal.

Dugang pa, sistematiko ang pasismo sa estado batuk sa mga mamumuo sa rehiyon. Sa Compostela, ComVal, pitos ang kahimtang sa 5 ka progresibong unyon nga aktibong nagbatuk sa kapitalistang pagpahimulos. Natala gikan Mayo 2017 hangtud Abril 2018 ang 125 ka kaso sa pugos nga pagpatambong sa 66th IB sa mga kontra-KMU nga mga pulong-pulong; pito (7) ka kaso sa pugos nga pagpahawa sa ilang panimalay;

131 ka kaso sa pagpanghulga, sarbeylans ug pagpanghadlok; ug 5 ka kaso sa pwersadong pagsulod sa panimalay sa mga mamumuo, pagpanglungkab ug pagbutang og *planted* nga ebidensya.

Kapin 1,500 ka mga mamumuo ang gipugos sa mga tropa sa AFP sa probinsya nga “limpyohan ang ilang mga ngalan” tungod mga tigsuporta kuno sila sa NPA.

Nasudnon ang dagway sa walay puas nga atake sa rehimeng US-Duterte batuk sa hut-ong mamumuo. Sa kaulohan niadtong Enero, inay nga iregularisa sa PLDT ang 7,300 ka kontraktwal niini, gipangtangtang ang mga mamumuo kinsa nagserbisyo sa kompanya og pila ka dekada. Sa NutriAsia nga tigmuagna sa SilverSwan Soy Sauce ug Datu Puti Suka, kapin 1,400 sa 1,500 ka mamumuo niini ang kontraktwal bisan pa pila ka tuig nang nagtrabaho sa kompanya.

Walay pulos ang gipirmahang Executive Order 51 sa rehimen niadtong Mayo tungod naghatag lang kini og dugang ligal nga paagi aron makalikay ang mga kompanya sa pagregularisa sa ilang mga mamumuo, sama sa gihimo sa Jollibee nga daan nang gimandoan sa Department of Labor and Employment nga iregularisa ang 6,482 ka mamumuo niini.

Sa mga empresa diin maisugong mi-barog ang mga mamumuo sa welga alang sa makabuhing suholan, seguridad sa trabaho ug uban pang katungod, armadong pulis gawas sa *private security* sa kompanya ang giatbang sa mga nagkunsabohay nga rehimeng Duterte ug mga kapitalista. Mangtas nga gipangbungkag ang mga welga ug gipangkulata ang mga mamumuo ug ilang tigsuporta, sama sa nahitabo sa Shin Sun Tropical Fruits sa Compostela niadtong Hunyo 2017; NutriAsia sa Marialo, Bulacan niadto lang Hunyo; ug daghang uban pa.

Matud sa Center for Trade Union and Human Rights (CTUHR), sulod lang sa 2 ka tuig sa rehimeng Duterte, aduna nay 29 ka mga biktima sa ekstrahudisyal nga pagpatay sa mga mamumuo. ★

## Wala kay trabaho? Target ka sa Oplan Tanggal Tambay ni Duterte




SA MANDO ni Duterte, 28,000 na ka tawo ang iligal nga gipangpriso sa tibuok nasud samtang patay si Genesis “Tisoy” Argoncillo, 22 anyos, sulod lang sa 3 ka semana sukad gipatuman sa Philippine National Police ang “Oplan Tanggal Tambay.” Aron makagawas sa presohan, ginapabayad og multa nga P200 ngadto sa P1,000 ang mga kabus.

Ginatago sa rehimeng US-Duterte ang kamatuoran nga kini mismo ang hinungdan nganong adunay mga “tambay.” Kadaghanan kanila mga biktima sa kawalay trabaho, kontraktwalisasyon, kawalay balay, walay undang nga pagmahal sa presyo sa batakang palaliton, ug pagpasagad sa gobyerno sa paghatag og batakang serbisyo sama sa edukasyon. ★

# Unsa ang dagway sa usa ka tuig sa martial law sa Mindanao?

Datus tinipon gikan sa mga mantalaan, internet ug mga organisasyon. Mayo 2017 - Mayo 2018

Mga apektadong sibilyan sa tibuok isla tungod sa grabeng militarisasyon:



## KAMANGTAS NGA WALAY SAMA

Sa inisyal nga taho sulod sa usa ka tuig, mokabat sa:

- **131** ang biktima sa pagpatay (wala pay labot ang gipangpatay tungod sa gyera kontra-droga)
- **488** ka ilegal nga pagaresto ug pagpreso
- **404** ang gipasakahan og tumo-tumong kaso

- **59** ka insidente sa pagpamomba sa mga komunidad gawas sa Marawi City
- **18** ka pagpang-istraping
- **81** ka pagbakwit sa kapin kon kulang **404,654** ka sibilyan gikan sa **144** ka komunidad
- **708** ka kaso sa pagpanghulga

Ang balaod militar sa rehimeng US-Duterte usa ka mangtas nga gyera batuk sa mga sibilyan. ★

# Para kang kinsa ang balaod militar sa Mindanao?

GIBUTYAG SA usa ka artikulo sa *Ang Bayan* niadtong Enero 21 nga usa sa mga rason sa pagpalawig sa balaod militar sa Mindanao mao ang pagratsada ni Duterte sa mga proyektong imprastraktura ilalom sa iyang programang Build, Build, Build.

Pondohan sa mga utang gikan sa mga imperyalistang nasud ug institusyon ang maong mga proyekto nga gigambalay sa Mindanao Development Corridor.

Kabahin sa maong mga proyekto ang Mindanao Logistic Infrastructure Network nga pundohan sa Japan International Cooperation Agency (JICA). Mopalayas kini sa mga komunidad sa Lumad, Moro ug setler nga agian sa proyekto sa Cagayan de Oro, Butuan, Surigao, General Santos ug Davao.

Dugang pa, moresulta sa dislokasyon sa dili moubos

6 ka barangay ang 280-kilometrong kalsada nga proyekto sa Zamboanga Peninsula. Sa usa ka bahin lang sa maong proyekto, sobra 400 ka pamilya ang papahawaon, lakip ang mga Lumad nga Subanen ug Kolibugan, samtang lain pang kapin 32,000 metros kuwadrado nga umahan ang maapektohan.

### SUNDI SA P. 9

MINDANAO BUILD, BUILD, BUILD

Gibahin-bahin sa tulo ka dagkong internasyunal nga ahensya alang sa pagpautang ang mga dagkong proyekto sa Mindanao. Ang USAID, JICA, ug ADB magbahin-bahin sa tulo ka bahin sa Mindanao Development Corridor.

PROYECTO	UTANGON
Mindanao Development Corridor	\$834 M
Public Transport Modernization sa Davao	\$70 M
Mindanao River Basin Flood Control Project	\$160 M
Regional Development Project sa South Central Mindanao	\$100 M
Mindanao Railway Project	\$628.45 M
Bangsamoro Development Plan: Phase 2	\$340 M

Gikan sa Ang Bayan, Enero 21, 2018



# Rehimeng US-Duterte: Terroristang tigpatay sa Lumad ug mag-uuma!

ni Sabel Mandalangan

Ilalom sa Proklamasyon 360 ni Duterte, gideklara nga “terrorista” ang PKP, BHB ug NDFP. Sa pagkatinuod, ginatarget karon sa kaaway ang bisan kinsa nga mosuporta sa rebolusyonaryong kalihukan, labaw na ang masang mag-uuma ug Lumad.

Enero ning tuiga gibutyag sa AFP nga nag-unang target niini mao ang rehiyon sa Davao partikular ang Davao del Norte kay kuno anaa dinhi ang pinakalapad nga ihap sa NPA. Gipalihok niini ang dili moubos tulo ka batalyon sa Talaingod ug Kapalong sa Davao Del Norte, apil na sa Paquibato District. Ilalom sa 16th IB, daghan na ang gitaho nga mga kaso sa pagpatay sa mga lider masa ug pugos nga pagpasurender sa mga mag-uuma ug Lumad.

Pag-abot usab sa 56th IB nga giilang *torture battalion* sa Sitio Palisan, Brgy. Palma Gil, pugos nga gipapahawa ang mga Lumad kay kuno motukod og detatsment samtang adunay mga panimalay nga gipangguba ug gipanglungkab. Gipangsaywar usab ang mga negosyante sa Sitio Nabunturan. Aduna usab mga bana sa mga benipisyaryo sa 4Ps nga pugos nga gipatreyning isip CAFGU ug paramilitar.

Labaw pa, sa pagtanyag ni Duterte ngadto sa Lumad og P25,000 sa matag Pulang manggugubat nga ilang mapatay, nagapanghulhog si Duterte og labaw pang kalisang aron bungkagon ang panaghiusa sa katawhang Lumad batuk sa pasistang rehimen.

Niadtong Pebrero, gipili isip tsirperon sa National Indigenous People’s Council for Peace and Development

(NIPCPD) si Special Operations Group Bagani Long Range Platoon Leader Ramon Ali. Ang NIPCPD mao ang nasudnong dagway sa karaang Mindanao IP Council for Peace and Development nga gipangulohan ni Joel Unad kinsa responsable sa pagpamaligya og yutang kabilin sa mga distrito sa Davao City.

Ang kasamtangang gyera ni Duterte batuk Lumad ug mag-uuma anaa sa laraw sa pagyukbo sa mando sa iyang mga among langyaw sama sa US, Russia, China ug Japan aron gawasnon nilang kawkawon ang bahandi sa atong nasud. Dugay nang gibaligya ni Duterte ang bahandianong kabukiran sa Mindanao para sa mga abanteng teknolohiya ug mga himang militar nga iyang gamiton sa pakiggubat batok sa BHB ug katawhang nakigbisog.

Una na niyang gisaad ngadto sa mga imperyalista ang bukid sa Pantaron nga anaa sa Talaingod nga puno sa bulawan ug uban pang minerales.

Yawe sa pag-atubang sa dakong operisyon sa kaaway ang planadong pagdepensa sa base, kusog nga kalihukang masa ug sunsong aksyong militar. Kinahang-

lan maglunsad ang masa og kusog nga anti-pasistang kalihukan aron ibutyag ug sukdan ang mga pagpanglapas sa tawhanong katungod nga hinimoan sa AFP. Labaw sa tanan, mahinungdanon ang mga sunson nga aksyong militar aron dugmukon ang pwersa sa kaaway. Angayang hiusahon ang pwersa sa mga milisyang bayan ug lokal nga yunit gerilya aron sa koordinado nga kampanyang militar.

Gipamatud-an sa kasaysayan nga dili mapahuyang sa pasistang estado ang armadong pakigbisog, apan mas mopakusog pa kini sa pagsukol sa masa. ★

# Walay laing kapilian

**W**ala nay masa nga nagtuo pang “alang sa katawhan” si GRP Pres. Rodrigo Duterte. Duha pa lang ka tuig sa pwesto, hingpit na niyang gibadbad ang iyang maskara sa pagpakaarun-ingnong kontra-imperyalismong US ug kontra-oligarkiya siya. Sama sa nangaging mga presidente sa reaksyunaryong gobyerno, ang interes sa nagharing hut-ong ug ang pagpabilin sa mapahimuslanong malapyudal ug malakolonyal nga sistema ang padayong gipanalipdan ni Duterte.

Apan maisugong ginasuklan sa katawhan ang mga ekonomikanhon ug pulitikanhong atake sa rehimeng US-Duterte sa tibuok nasud. Nagawelga ang mga pidan ka libong mga mamumuo batuk sa kontraktwalisasyon ug alang sa makabuhing suholan sa mga kapitalistang empresa ug plantasyon. Ginaprotesta sa masang mag-uuma ug Lumad ang pagpangawkaw sa ilang mga yuta sa hakug nga interes sa nagharing hut-ong.

Pasismo ang gitubag sa rehimeng US-Duterte sa mga lehitimong panawagan alang sa trabaho, suholan, yuta ug uban pang demokratikong katungod. Iyang gipakusog ang kontra-insurhensiyang kampanyang Oplan Kapayapaan nga mipatay og 83 ka sibilyan ug gipatuman ang balaod militar nga nagsabwag og kalisang sa 7,517 ka pamilya o 55,742 ka indibidwal sa atong atong rehiyon.

Aron panalipdan ang interes sa adunahan, mangtas nga gibungkag ang mga piketlayn sa mga mamumuo ug gideploy ang liboan ka mga pasistang tropa sa AFP sa lain-laing dapit sa rehiyon aron ablihan ang kayutaan alang sa mga langyawng minahan ug proyektong Build, Build, Build. Paspas ug kaylap ang paghanyag sa iyang rehimen sa lapad ug tabunok nga kayutaan sa mga mag-uuma ngadto sa mga dagkung agri-korporasyon ug langyawng kompanya.

Hingpit nang nabutyag nga kontra-kalinaw si Duterte sa iyang pagbasura sa hinabing pangkalinaw tali sa NDFP ug GRP. Samtang abli gihapon ang NDFP sa negosasyon, tin-aw na nga walay sinserong interes si Duterte nga molingkod aron hatagan og komprehensibong solusyon ang mga batakang suliran sa masang Pilipino.

**Busa, si Duterte mismo ang naghawan sa atong dalan sa kasamtangan: wala tay laing kapilian kun dili ang palagputon siya sa gahum samtang gina-asdang ang gubat ngadto sa hingpit nga kadaugan.**

Tinuod nga ang “IP-centric” nga kinaiya sa Oplan



Kapayapaan o pagpukos niini sa mga Lumad ug ang pagbubo sa 65% sa tibuok pwersa sa AFP sa Mindanao aron ipatuman ang balaod militar nakamugna og lisod nga kahintang sa pagpatuman sa atong mga pulitikal nga gimbuhaton. Apan mas labawng tinuod nga ang katilingbanong krisis ug nagkamangtas nga pasismo nagsilbing tabunok nga yuta alang sa rebolusyonaryong pagsukol sa katawhan. Huptan nato kini nga pagtulun-an sa kasaysayan.

Hinanaling tahas sa matag rebolusyonaryo ang hukasan ug batukan ang mga kontra-katawhang pakana sa rehimeng US-Duterte. Ang inadlaw nga atake sa rehimen sa kinabuhi ug panginabuhian sa masa ug ang walay-kaulaw nga konsolidasyon niya sa gahum aron matukod ang pasistang diktaturya naghimulag kang Duterte dili lang sa linupigang hut-ong apan apil na bisan sulod mismo sa nagharing hut-ong. Nangahulogan kini nga paborable ang higayon sa pagtukod sa lapad nga hiniusang prente, diin bag-as ang gatusan ka libong organisadong masa nga ginapangulohan ang minilyon ka masa sa rehiyon, lakip ang mga sektor sa kasyudaran.

Kinahanglan natong huptan ang mga batakang prinsipyo sa pagpukaw, pag-organisa ug pagpalihok sa masa aron sistematiko ug adunay direksyon ang atong gimbuhatong masa. Angayang mahimong sinsin sa pag-organisa, hingpit nga hawiran ang rebolusyonaryong makihut-ong nga linya sa pagpalihok sa masa ug mahimong mapangahason ug mamugnanon sa pagtukod sa mga organo sa pulitikanhong gahum subay sa giabot nga malukpanong paglambo sa atong mga base.

Sa pagpalihok sa masa, huptan nato ang yaweng dugtong nga agraryong rebolusyon aron matukod ang lapad nga kahiusahan sa bagang duot sa mga mag-uuma ug Lumad sa kabukiran. Maglunsad kita og mga kampanya aron patas-an ang presyo sa palit

sa ilang produkto, usbawan ang suholan sa mga mamumuong panguma ug wagtangon ang mapahimuslanong usura. Sa mga lugar diin mahimo na, palihukon nato sila aron bawion ang ilang yuta gikan sa mga agalong yutaan ug dagkung agri-korporasyon. Mas isog ang masa nga nasubhan sa makihut-ong nga pakigbisog alang sa ilang ekonomikanhon ug uban pang demokratikong interes.

Labaw sa tanan, ang tanang yunit sa BHB, lakip ang mga lokal nga yunit gerilya, kinahanglang hi-usahon nga atubangon ug pakgangon sa rebolusyonaryong armadong pagsukol ang kamangtas sa pasistang rehimen pinaagi sa paglunsad og mga taktikal nga opensiba subay sa nagkalapad ug nakalalom nga baseng masa.

Tungod ginaatake sa mga tropa sa AFP ug ilang mga paramilitar ang atong base, angayang ipokus sa BHB ug mga lokal nga gerilyang pwersa ang ilang bira batuk sa pinaka-mangtas ug pinakagikasilagang kaaway, labaw na kadtong mga kriminal nga tigpatay ug tigsabwag og kalisang batuk sa mga Lumad ug mag-uuma sa kabukiran. Kinahanglan mahatagan og rebolusyonaryong hustisya ang tanang mga biktima sa pasismo sa rehimeng US-Duterte.

Mahimong mas tam-is ang selebrasyon sa ika-50 ka tuig sa Partido Komunista ng Pilipinas kun hugot natong mahuptan kining mga hagit sa kasamtangang kahintang. Wala nay mas bantugang paagi sa pagsaulog kun dili ang pagpatigbabaw sa atong mga kahuyangan sa pag-asdang sa tulo sa sangkap sa malungtarong gubat aron masiguro ang hingpit nga kapildihan sa imperyalismo, pyudalismo ug burukrata kapitalismo sa tibuok nasud.

**Sa ingon, wala usab laing kapilian ang rehimeng US-Duterte kun dili ang pagkanaog sa pulitikanhong gahum kay tingali unyag mapukan sa nakakusog nga pagsukol sa katawhan.** ★

# Atake sa katungod sa Lumad para sa edukasyon, atake sa rebolusyon ug katawhang Pilipino

**G**inapaniguro sa National Democratic Front of the Philippines nga himuon ang “tanang gikina-hanglang lakang aron... hatagan o togutan ang mga eskwelahan ug edukasyon sa mga kabataan” (Artikulo 5, Sek 2., Deklarasyon ug Programa sa Aksyon sa NDFP alang sa Katungod, Pagpanalipod ug Kaayohan sa Kabataan, Abril 24, 2012).

Labing lahi kini kun itandi sa pila ka higayong bahad ni GRP Pres. Rodrigo Duterte nga pagpahawa sa mga Lumad sa ilang mga komunidad ug pagbomba sa ilang mga eskwelahan.

Mabayanihon ang pakigbisog sa mga Lumad aron hatagan og edukasyon ang ilang kabataan. Sakto nilang natuki ug napraktika nga kabahin sa pagpanalipod sa ilang yutang kabilin ang pagpaniguro nga makaeskwela ang ilang mga sumusunod aron dili yanong malingla sa mga saad ug pagpanghaylo sa nagha-ring hut-ong sama ni Duterte.

Gikan sa ilang kaugalingong paningkamot ug sa tabang sa mga nagpakabanang sektor sa katilingban, hinayhinay nilang gitukod ang mga simpleng istruktura ug gibansay ang pipila sa ilang mga kabanay aron mahimong magtutudlo sa ilang mga eskwelahan.

Pila ka tuig ang milabay, daghang mga kabatan-onan ug mga propesyonal ang nagserbisyo sa mga tulonghaan sa Lumad ug nahimugso ang mga prog-rama sama sa malahutayong panguma, panglawas ug uban pang mga katilingbanong serbisyo.

Apan tungod interes sa nagharing hut-ong nga ipabiling burong ang Lumad sa ilang mga katungod aron sayon ang pag-ilog sa ilang yutang kabilin ug mga natural nga bahandi, walay-hunong nga gina-atake sa reaksyunaryong estado ang mga komunidad sa Lumad ug ilang mga eskwelahan.

## UNOS SA HABAGATAN

Rubi del Mundo



Ilalom sa giingong **IP-centric approach** sa Oplan Kapayapaan ug balaod militar dinhi sa Mindanao, samot pang gipa-igting sa rehimeng US-Duterte ang atake sa katungod sa Lumad para sa edukasyon.

Matud pa sa datus sa **Save our Schools Network**, usa ka alyansa nga nanalipod sa katungod sa mga Lumad para sa edukasyon, sukad nilingkod si Duterte isip presidente, **7,766 ka estudyante ug 451 ka mga magtutudlo ang apektado sa militarisasyon** sa AFP ug ilang mga paramilitar sa tibuok Mindanao.

Sa pag-abli sa klase niining Hunyo, **57 ka mga eskwelahan sa Lumad ang pugos nga gisirad-an** nga napekto sa 2,209 ka estudyante ug 98 ka mga magtutudlo.

Daghang kaso ang natala sa pagpundo sa mga tropa sa AFP sa mga eskwelahan sa Lumad samtang ginapugos silang “mosurender” isip mga rebelde. Pila ka higayong gibombahan sa mga pasista ang ilang mga komunidad, gi-istraping ang ilang mga panimalay ug gi-aresto ug gipasakahan og tumo-tumong kaso ang ilang mga magtutudlo ug opisyal sa Parents-Teachers Community Association (PTCA). Sa kinatibuk-an, natala ang **535 ka lain-lain insidente sa pagyatak sa tawhanong katungod** sa mga estudyante, magtutudlo ug mga ginikanan gikan Hulyo 2016 hangtud Marso 2018.

Ang mangtas nga atake dinhi sa atong rehiyon sa rehimeng US-Duterte giingulagway sa kaso sa 18-anyos nga

estudyanteng Manobo nga si **Obello Bay-ao** kinsa **gipusil-patay niadtong Setyembre 5, 2017** sa Sitio Dulyan, Brgy. Palma Gil, Talaingod, Davao del Norte ug sa kasong pagpatay sa 27-anyos nga Dibabawon nga si **Beverly Geronimo**, presidente sa PTCA sa usa ka eskwelahan sa Lumad sa Sitio Cogonon, Bry. Salvacion, Trento, Agusan del Sur niadtong Mayo 26 niining tuiga.


Atubangan niining pasismo sa rehimen, maisugong nagbarog ang katawhang Lumad. Sa mga *evacuation center* sa lain-laing dapit sa Mindanao, padayon nilang gipaeskwela ang ilang kabataan taliwala sa kalisod sa kahimantang ug kawad-on sa rekursu. Pila ka higayon silang nagprotesta atubangan sa opisina sa Department of Education ug mga hedkwarter sa AFP.

Atong ginadasig ang tanang Lumad sa rehiyon ug sa tibuok Mindanao nga magpadayon sa pakigbisog alang sa ilang katungod dili lang sa edukasyon, apan sa tanang katilingbanong serbisyo. Ginapakita sa balud-balod nga suportang katawhan sulod ug gawas sa nasud ang pagkamakatarunganon sa ilang mithi.

Sa pikas bahin, ang nagkalapad nga pagkudena sa mga pasistang atake sa AFP ug ilang mga paramilitar nagpamatuod nga sayod ang masang Pilipino nga ang sistematikong kampanya sa rehimeng US-Duterte batuk sa mga eskwelahan ug komunidad sa Lumad dagway usab sa atake sa tibuok katawhang Pilipino.

Gina-awhag nato ang tanang rebolusyonaryong pwersa sa rehiyon nga suportahan ang pakigbisog sa Lumad alang sa edukasyon tungod mahinungdanong kabahin kini sa atong makasaysayanong pakigbisog aron lumpagon ang imperyalismo, pyudalismo ug burukrata kapitalismo sa atong nasud. ★

... ang nagkalapad nga pagkudena sa mga pasistang atake sa AFP ug ilang mga paramilitar nagpamatuod nga sayod ang masang Pilipino nga ang sistematikong kampanya sa rehimeng US-Duterte batuk sa mga eskwelahan ug komunidad sa Lumad dagway usab sa atake batuk sa tibuok katawhang Pilipino.



Mga estudyanteng Lumad nagpadayon sa pag-eskwela sulod sa mga evacuation center sa lain-laing dapit sa Mindanao.

GIKANSANG ATONG MASA



## Angayan ba kitang mosulod sa localized peace talk?

Dili gyud. Paagi ra na aron matibuok sa nagharing hut-ong kung asay huyang ug asay lig-on nga baseng masa. Kung motugot kita niana, nagpasabot kita ray naghikayad sa atong kahuyangan ug dakog posibilidad nga malumpag ta niana. Unsay pagtuo sa nagharing hut-ong sa atoa, pinutos og dahon sa ipil-ipil atong utok?

**Aedan, Nabunturan**

Dili. Taktika lamang sa GRP/berdugong AFP aron masuta o mailhan ang mga anaa sa nataran nga lumilihok, susama sa nahitabo sa unang panahon.

**Berong, Nabunturan**

Dili kana ang makasulbad sa ugat-hinungdan sa kalisod sa katawhan. Una, walay kasegurohan sa panarbaho, ubos og suholan, samtang kanunay nagataas ang presyo sa palaliton, kawalay yuta, ug uban pa. Naa pa gyuy TRAIN!

**Neneng, Montevista**

Dili man langkob sa *localized peace talks* ang kinatibuk-ang programa sa NDF ug dili usab matubag ang uban pang nasudnon ug internasyunal nga mga problema. Labaw sa tanan, dili niini maresolba ang problema sa malakolonyal ug malapyudal nga katilingbang Pilipino.

**Louie, Cotabato City**

Taktika lang na nila para madakpan ang *negotiators*, dili ta magpailad nila. Ipadayon ang GRP-NDF *peace talks* unya walaon ang *martial law*.

**Andres, Manay**

Unsay makuha nato sa *local peace talk*? Sigem gani operisyon, unya ang AFP sa amoa pasanginlan pa mi nga NPA daw mi.

**Roger, Tarragona**

Kinsa kunoy estoryahon ana nila Duterte sa *local peace talk*? Ang kauban dinhi sa amo dili man gyud moapil ana. Samot na mi nga mga masa dili moapil. Pamresuhon pa lang mi.

**Arman, Tagum City**

Ang badyet anang *local peace talk* maayo pa isuporta sa panguma sa mga mag-uuma.

**Tata, Kidapawan City**

Kaya ba gud diay sulbad sa lokal nga gobyerno ang mga kasabutan sama sa CASER? Maglisud man gani sila og sulbad sa problema sa droga, hinungdan pa kaha sa gyera?

**Brad, Davao City**

Wala na tay malaoman pa ni Duterte. Maayo pa padaugon na lang ang gubat sa katawhan kay sigurado ang benepisyo sa masang kabus.

**Ariel, Monkayo**

Dili tungod kay ang hinungdan sa pag-alsa sa katawhan ang kawad-on sa ekonomiya nga nasudnon ang dagway. Dili paigo ang *local peace talks*.

**Jean, Manay**


Local peace talk man na o kadtong gipahigayon tali sa GRP ug NDFP sa Norway, kutob nga si Duterte ang presidente, binuangan lang ta. Tarong ba gud diay nang samtang naghigot, bombahan ang mga komunidad ug eskwelahan sa Lumad? Palagputon na siya sa pwesto!

**Artem, Diwalwal** ★

## Unsay kalahian sa atong rebolusyonaryong buhisan diha sa buhisan sa reaksyunaryong gobyerno?

“**A**ng rebolusyonaryong kalihokan adunay teritoryo... aduna kini kaugalingong gobyerno. Gobyerno sa katawhan. Ang mga kapitalistang mosulod sa erya nagrespeto niini nga gobyerno. Mao nga nagabayad sila og *tax*... Ang buhis nga gikan sa kapitalista, gigamit kana sa rebolusyon. Gipamalit og bala, medisina ug uban pang panginahanglan sa gubat. Ang uban niini gigasto alang sa *social services*—sa literasiya ug numerasiya, edukasyon sa kabatan-onan, serbisyong medikal, produksyon sa masa, ug pundo sab sa rebolusyonaryong gobyerno.


**Sukwahi kana sa rehimen nga gibuhisan ang mga pobre, gipatas-an ang *tax* sa mga pobre, apan ang mga kapitalista libre, unya ang *tax* padulong sa balsa sa mga dagkong pulitiko, ang mga pobre nakutas na.**



*Pakighinabi sa Pasabilis! sa anhing Kumander sa 1st Pulang Bagani Battalion nga si Leoncio "Ka Parago" Pitao niadtong Marso 2006*

“**A**ng pinakagrabeng ginahimo sa reaksyunaryong gobyerno sa gikulekta niining buhis mao ang pagbayad una sa nagkadakong langyawng utang; tagbawon ang korapsyon sa mga burukrata sa ilang paghatag og pribelihiyo ug kontrata ngadto sa mga langyaw ug dili langyaw nga mga kompanya; paggasto sa militar, pulis ug ilang mga paramilitar aron kontrolon ug puohon ang katawhan; ug dagku nga mga sikretong pundong operisyon ug paniktik alang sa mga *death squad* ug ispesyal nga mga operisyon.

*Prof. Jose Maria Sison, Chief Political Consultant sa NDFP. Gikan sa "Adunay gahum sa pagbuhis ang Demokratikong Gobyerno sa Katawhan."*



# Masa ang maligsan sa TRAIN ni Duterte


**A**ng ambisyosong programa ni GRP Pres. Rodrigo Duterte nga **Build, Build, Build** langkoban sa lain-laing mga proyektong imprakstratura nga pundohan sa bilyones nga pautang gikan sa mga langyawng nasud sama sa US ug China. Isip kolateral, gikinahanglan sa rehimen nga pugos nga himuong balaod niadtong Enero ang Republic Act 10983 o Tax Reform for Acceleration and Inclusion kon TRAIN.

Sa pag-abli sa tuig, gisugat ang masang kabus sa lain-laing probinsya sa rehiyon sa pagsirit sa presyo sa mga batakang palaliton. Sa North Cotabato, misaka ngadto sa P27 matag kilo sa bugas nga NFA samtang anaa sa P43 ang bugas nga Tonner. Sa Davao del Norte, P28 ang kilo sa NFA samtang P52 ang Tonner. Sa Davao Oriental, ang NFA P38 ang kilo samtang P40 hangtud P51 ang Tonner. Misaka usab ang presyo sa bugas nga mais og dugang P3 ngadto P5 matag kilo.

Ang maong pagsaka sa mga batakang palaliton usa ka manipestasyon sa gikabalak-ang implasyon nga bunga sa pagpabalaod sa TRAIN. Dili lang ang presyo sa bugas ang nisirit tungod niini nga balaod, lakip na ang pagkaon sama sa gulay, asukal, kape ug uban pa ug mga serbisyo sama sa kuryente ug tubig tungod sa pagsaka sa presyo sa mga produktong petrolyo.

Ginadahum sa TRAIN nga makapangalap og sobra P1.3 trilyon aron ipanggasto sa mga bag-ong tulay, rilis sa tren, pantalan ug airport samtang walay badyet nga igahin alang sa mga serbisyong irigasyon, galingan, eskwelahan o ospital nga maoy panginahanglan sa mayorya sa katawhan. Aron makab-ot kini, tumong sa TRAIN nga dugangan pa ang buhis nga awtomatikong ginabayad sa 23 milyon ka mga Pilipino gikan sa pagpalit og mga produktong samtang hatagan og eksempyon sa buhis ang mga adunahan ug mga korporasyon. Sa tinuod, daan nang luwas sa buhisan ang kita sa 15 milyon ka pinakakabus nga pamilyang Pilipino maong walay epekto kanila ang pagarpar sa rehimen nga madugangan ang ilang kita tungod sa TRAIN.


Sa mga pamahayag niini, malimbungong ginapakamenos sa rehimen Duterte ang epekto sa balaod diha sa inadlaw-adlaw nga kinabuhi sa kabus nga Pilipino. Tataw nga nagsumpaki ang baruganan niini tungod samtang gipahingusog niini nga wala o gamay lang ang mamahimong epekto sa balaod sa mga batakang palaliton, mibungat usab kini nga aduna kunoy badyet nga P200 matag bulan ang ihatag sa matag usa sa 10 milyon ka pinakakabus nga pamil-



yang Pilipino. Ang “hinabang” nga ginapanghambog sa TRAIN siguradong mabulit sa korapsyon ug magamit lang sa kontra-insurhensiyang programa sa rehimen sama sa 4Ps.

**Kun dili ang katawhang kabus ang makabenepisyoso sa balaod nga TRAIN, kinsa diay ang tinuod nga mabulahan niini? Walay lain kun dili ang mga adunahang pamilya ug mga dagkung kompanya sa nasud.**

Matud sa pagtuon sa IBON Foundation, madugangan pa og P90,793 matag tuig ang kita sa 10% sa pinaka-adunahan sa Pilipinas kinsa nagakita na daan og P104,170 o sobra pa matag bulan. Dugang pa sa IBON, inay nga buhisan ang mayorya sa katawhan,



kinahanglang palambuan sa rehimen ang pagbuhis niini sa mga korporasyon nga mokabat sa P300-P400 bilyon matag tuig. Ang dugang pagbuhis usab sa 20 ka pinaka-adunahang pamilya sa nasud kayang mohatag og dugang P90 bilyon matag tuig.

Kaylap nga gikundena sa katawhan ang bag-ong kontra-kabus nga balaod sa rehimen Duterte. Sa Davao City, gipangunahan sa Kalipunan ng Damayang Mahihirap (KADAMAY) ug Kilusang Mayo Uno ang protesta batuk sa balaod niadtong Enero 18. Matud pa sa KADAMAY, makunhoran pa ang suholan sa kapin 15 milyon ka mamumu sa rehiyon kinsa daan nang nag-antos sa kasagarang P250 nga suholan matag adlaw tungod sa pagsirit sa presyo sa palaliton. Tungod niini, sunod-sunod na nga gilunsad sa katawhan nga protesta batuk sa TRAIN.

Matud pa sa usa ka mag-uuma sa Davao Oriental, ang mga adunahan ug mga langyawng korporasyon lang ang makasakay sa TRAIN ni Duterte samtang ang naghagong katawhan ang maligsan tungod sila ang himuong rilis aron hamloy ang dagan niini.



# Pagbiay-biay ni Duterte sa kababayen-ang NPA, kaylap nga gikundena

GISUGAT OG kaylap nga pagkundena ang kontra-kababayan-ang mando ni GRP Pres. Rodrigo Duterte ngadto sa AFP nga pusilon ang kinatawo sa mga kababayan-ang membro sa BHB aron “mawad-an na sila og pulos.”

Matud sa tigpamaba sa Makibaka sa Southern Mindanao nga si Ka Teresa, ginatubayan ni Duterte ang “pasistang tradisyon sa AFP sa pagpanglugos ug sobinismo sa kalalakin-an.” Ang MAKIBAKA ang rebolusyonaryong organisasyon sa kababayan-an sa nasud.

Alang sa Gabriela Women's Party, usa ka progresibong partylist, ang maong mando nagpamatuod lang nga si Duterte ang pinaka-delikadong macho-pasista nga naglingkod sa reaksyunaryong gobyerno karon.

Samtang matud ni Ka Maria Malaya, tigpamaba sa NDFP-Northeastern Mindanao, ang maong tampalasang pahayag ni Duterte naghatag lang og dugang lisensya ngadto sa mga membro sa AFP ug PNP sa walay pagpanagana nga paglapas sa tawhanong katungod, ilabina sa pagpanamastamas sa kababayan-an.

“Bangis si Duterte sa kababayan-an dili lang sa pulong apan samot na sa buhat,” matud ni Ka Teresa. Matag adlaw, ginalapdos sa balaod nga TRAIN ang mga inahan sa naghagong katawhan

kinsa nag-abaga sa pagpaigo sa halos dikabuhi nga suholan atubangan sa walay puas nga pagsirit sa presyo sa mga batakang palaliton. Gisaysay usab niya ang pag-antos sa mga kababayan-ang mamumuo sa mga paktorya nga nahimong biktima sa nagapadayong kontraktwalisasyon ug sa mga kababayan-ang mag-uuma nga ginabiktima sa mga asyenda, umahan ug mga plantasyon tungod sa kawalay tinuod nga repormang agraryo.

“Sa pagkatinuod, hadlok si Duterte sa kababayan-an, labaw na kadtong dunay lig-ong baruganan kinsa gaila kaniya isip usa ka pintas nga diktador sa kahiladman. Nahadlok siya sa mga babayeng gipili ang lisod nga dalan sa armadong pakigbisog batuk sa mapahimuslanong reaksyunaryong gobyerno nga desperado niyang ginapabilin pinaagi sa pasismo ug diktadurya. Sayod siya nga sa pag-alsa sa katawhan aron palagputon siya sa gahum, sobra katunga niini mao ang

mga inahan, anak nga babaye ug uban pang kababayan-an gikan sa lain-laing sektor,” sumpay ni Ka Teresa.

Gibutyag ni Rubi del Mundo, tigpamaba sa NDFP-SMR nga sa kasamtangan, liboan ka kababayan-an ang nahimong lumilihok alang sa armadong pakigbisog, agraryong rebolusyon ug pagtukod sa base sa rehiyon.

“Mas mahinungdanon, daghan pang kababayan-an ang misampa sa BHB. Kadaghanan kanila naglihok isip mga medikal samtang ang uban nahimong mga Pulang kumander o instruktur sa pulitika sa mga yunit sa NPA.” ★



WALA MAHADLOK SA MGA BAHAD UG PAGBIAY-BIAY SA PASISTANG DIKTADOR NGA SI DUTERTE. Mga Pulang manggugubat atol sa pagsaulog sa Kalibutanhong Adlaw sa Kababayan-an niadtong Marso 8. Tan-awa ang bidyo sa [www.youtube.com/watch?v=RACYC1p80tA](http://www.youtube.com/watch?v=RACYC1p80tA) o sa Facebook page nga @pasabilis.smr.

## PARA KANG KINSA... GIKAN SA P. 5

Uban pang mga proyekto mao ang Transport and Logistics Master Plan nga kuno magmodernisa sa pampublikong transportasyon sa Davao City, ang Regional Development Project sa South Central Mindanao, ang Mindanao River Basin Flood Control Project ug ang Mindanao Rails Project.

Dugang sa Ang Bayan, gibahin sa USAID, JICA ug ADB ang 3 ka dagkung bahin sa Mindanao Development Corridor samtang ang World Bank ang moatiman sa Reconstruction and Development Program nga kabahin sa Bangsamoro Development Plan.

Sa mga dagkung proyekto pa lang, gibana-banang mokabat sa \$213.2 bilyon ang kinahanglang utangon sa Pilipinas. Kargo sa katawhan ang pagbayad niini pinaagi sa mas taas nga singil sa serbisyo ug pagbayad sa gobyerno og utang.

Kabahin ang Tagum Agricultural Development Company (Tadeco) sa mga Floirendo, Unifruitti, Sumifru, Dole, Del Monte, Udenna Corp., ug ang International Container Terminal Services, Inc. sa mahatagan og kontrata sa maong mga proyekto.

Sa pikas bahin, human giguba sa rehimeng Duterte ang Marawi, planong ablihan ang syudad alang sa kapitalistang interes sa mga langyaw sama sa Sumitomo Mitsui Banking Corporation ug mga lokal nga negosyante sama nila Manuel V. Pangilinan, mga Ayala, sa Aboitiz Group, Jollibee Food Corp., Pepsi Cola Philippines, Coca Cola, World Vision, San Miguel ug SM kinsa nagsumiter na og mga “proposal” alang sa lain-laing pamatigayon.

Gawas niini, midawat na ang rehimen og \$23 milyon gikan sa China ug \$2 milyon gikan sa Japan alang sa rekonstruksyon ug rehabilitasyon samtang anaa sa \$5.22 milyon ang gihatag sa ADB. Pinakadako gihapon ang ihatag sa US nga mokabat sa P1.06 bilyon. ★

## PEDERALISMO SA REHIMENG US- DUTERTE: Laraw alang sa pasistang diktadurya

Kini ang pamahayag ni Kaubang Jose Maria Sison, dungan sa pag-ingon nga walay plano si Duterte nga magtukod og usa ka pederal nga sistema sa gobyerno. Sa pagkatinuod, gusto niyang tukoron ang usa ka sentralisadong

sistema sa diktadurya sa presidensiya ug pamunoan ang mga rehiyunal nga gobyernong gipadagan sa mga dinastiya, lakip ang mga *warlord* ug labawng kurap nga mga burukrata sama niya.

Bisan pa man adunay pagbabag ug pagsaway sa minorya sa Kongreso, giratsada sa “supermayorya” ni Duterte ang House Concurrent Resolution No. 9 sa gipahigayong sesyon niadtong Enero 16. Sa maong sesyon, gipahunong sa pamunuan ang pagpangutana ug debate ug kalit nagpatawag og botohay. Gihatagan sa resolusyon og gahum ang Kongreso nga tukoron ang Senado ug Kongreso isip *constituent assembly* (con-ass) aron hisgutan ug andamon ang *charter change* (cha-cha) o pagbag-o sa Konstitusyong 1987.

Sumala sa unang mga taho, usa sa mga nalakip nga amyenda mao ang pagpalawig sa termino sa tanang naglingkod nga mga opisyal sama ni Duterte hangtud 10 ka tuig.

Miani og daghang pagsaway ang


pagpamugos sa rehimeng Duterte sa pederalismo pinaagi sa *con-ass*. Misimong 2 ka kanhing *chief justice* sa Korte Suprema nga sila Hilario Davide Jr. ug Reynato Puno ang babag sa gidali-dali nga *cha-cha*.

Sa pikas bahin, naglunsad og protesta ang mga progresibong organisasyon sa pagpanguna sa Bagong Alyansang Makabayan niadtong Enero 17 atubangan sa Kongreso. Nanawagan sila sa katawhan, sa mga senador ug mga kongresista nga ibasura ang *cha-cha* ug suklan ang pagbalik sa pasistang diktadurya nga itoy sa imperyalista.

Alang kang Ka Joma, aron makuha ang suporta sa US ug uban pang imperyalistang gahum alang sa pederalismo, gihanyag ni Duterte ang pagtangtang sa mga santa sa langyawng pamuhunan sa mga sektor nga eksklusibong para lang sa mga lokal nga pamatigayon.

Matud niya nga kun wala ang usa ka tinuod nga rebolusyonaryong kabagohan sa katilingban, magpadayong monopolyhon sa susamang mga nagharang pamilya sa dagkung komprador, agalong yutaan ug burukrata kapitalista ang tanang ang-ang sa gobyerno. ★





◀ **TALIWAL**  
sa mga org  
sanga sa Pa  
ang lain-lain  
nga anibers  
dugang kor  
paglunsad

# Hiusahon ang katawhang Pilipinon aron suklan ug palagputon ang pasistang rehimeng US-Duterte

**Kinutlo gikan sa pamahayag sa Komite Sentral atol sa ika-49 nga anibersaryo sa Partido Komunista ng Pilipinas, Disyembre 26, 2017**

ANG KOMITE SENTRAL nanawagan sa tibuok ginsakpan sa Partido nga mangandam sa pag-atubang sa mas malisud nga pakigbisog taliwala sa nagkamangtas nga kontrarebolusyonaryong gubat sa rehimeng Duterte nga minanduan sa US batok sa katawhang Pilipino ug ilang rebolusyonaryong pwersa. Sa samang higayon, maningkamot kita sa pagkab-ot sa mas daghang mga kadaugan diha sa padayong lawom nga paggamot sa han-ay sa katawhan ug pag-aghat kanila nga mosukol ug maglunsad og tanang mga porma sa pakigbisog batok sa pasistang tiranya.

**Kaduha na gipamatud-an sa nasudnon demokratikong kalihokang masa nga kaya nilang palagputon ang usa ka reaksyonaryong rehimen** pinaagi sa pagmontar og mga demonstrasyon sa gatusan ka libong katawhan ug sa pakigtimbayayong sa lain-laing pulitikanhong pwersa aron ihimulag ang reaksyonaryong pundok ug itukmod ang militar ug kapulisan sa pagbakwi sa ilang suporta. Pinaagi

sa bangis nga pag-atake ug paturagas nga pagpangyatak sa tawhanong katungod, ang rehimeng Duterte mismo ang nagatukmod sa katawhan sa pagsukol, paglunsad og mga demonstrasyon ug tanang porma sa anti-pasistang pakigbisog.

**Kinahanglang pangulohan sa Partido ug sa nasudnon-demokratikong pwersa ang mga anti-pasistang kampanya batok sa rehimeng Duterte aron malambigit ngadto sa mga anti-imperyalista ug antipyudal nga pakigbisog sa katawhan.**

Kinahanglang ibutyag ug ipanghimaraot nila ang pagka-ito'y ni Duterte sa imperyalismong US ug ikampanya ang pagtapos sa presensya sa militar sa US ug pagpanghilabot niini sa nasud. Ipanawagan usab nila ang pagtapos sa mga neoliberal nga mga palisiya diha sa pakigbisog sa mga mamumuo batok sa kontraktwalisasyon ug alang sa usbaw sa suholan, pag-asdang sa pakigbisog sa katawhang walay pinuy-anan aron okupahon ang proyektong

pabalay nga walay nagpuyo, sa pakigbisog sa mga drayber sa dyip batok sa korporatisasyon sa serbisyo sa transportasyon ug uban pa. Kinahanglang ibutyag nila nga ang nagpaluyo sa pasistang pagpanumpo sa mga mag-uuma ug mga nasudnong minorya mao ang interes sa mga dagkung mga langyawng kumpanya sa mina ug plantasyon. Dungan niini, kinahanglang padayon nga kusganong iasdang ang pakigbisog alang sa reporma sa yuta sa tibuok nasud, i-demanda ang pagbungkag sa mga dagkung asyenda ug sa pagwagtang sa mga *agribusiness venture arrangement* (AVA) ug susamang areglo nga nagahikaw sa mga mag-uuma sa pagpanag-iya ug pagkontrol sa yutang matikad.

**Ang Bagong Hukbong Bayan angayang makarekrut og mas daghan pang Pulang manggugubat**

tungod sa samot nga pagpamig-ot sa rehimeng Duterte sa mga ligal nga paagi sa demokratikong pagpadayag ug pakigbisog ug itukmod ang katawhan sa kahimtang nga wala nay laing maadtuan kun dili ang pagsalmot sa armadong rebolusyon.



Angayang pakusgon sa NPA ang gerilyang pakiggubat sa tibuok kapupud-an, maglunsad og mga taktikal nga opensiba batok sa mga yunit sa AFP, PNP ug kasumpay nga mga pwersang paramilitar, ingon usab sa paglunsad og mga punitibong operisyon batok sa mga ngilngig nga tulisan sa gobyerno ug mga korap nga mga upisyal, pulitikanhon ug kriminal nga mga kunsabo ug mga *death squad* sa rehimeng Duterte.

Nanghinambog si Duterte nga gamiton niya ang mga modernong mga hinagiban nga gikan sa militar sa US. Kinahanglang tun-an nato kini nga mga hinagiban, ang ilang mga katakus ug limitasyon aron tukma nato nga mapahauman sa depensiba man

◀ **SIMPLENG SELEBRASYON.** Sa lain-laing nataran sa rehiyon, kabahin sa pagsaulog sa anibersaryo ang mga kulturahong pasundayag sa masa ug mga Pulong manggugubat sama sa paghulagway sa nahitabong gyera sa Marawi ug mga taktikal nga opensiba nga gilunsad sa BHB.



**A SA BALAOOD MILITAR.** Malampusong nalunsad ang plano sa pulitikanhong gahum sa katawhan, Partido ug mga yunit sa BHB sa tibuok rehiyon ng mga aktibidad isip preparasyon sa ika-49 anibersaryo sa PKP. Lakip niini ang pagtukod og mga kumiteng rebolusyonaryo sa baryo kon KRB (1) ug mga pang-Partidong pagtuon (2).

**PAGPANGANDAM SA GUBAT. ►**

Atubangan sa balaod militar, kabahin sa preparasyon atol sa pagsaulog sa anibersaryo ang pagpangandam sa atake sa kaaway, sama sa paghimo og suyak sa mga Pulang manggugubat ug pagbansay sa mga medikal.



# Pilipino



**PKP SA KASYUDARAN. ▲**

Mga membro sa Partido ug mga rebolusyonaryong organisasyon sa Davao City atol sa ilang lightning rally niadtong Disyembre 22.

o opensiba. Dungan niini, kinahanglang planuhon nato ang pagguba o pagsakmit niini nga mga armas aron gamiton batok sa kaaway.

**Kab-uton nato ang mga target sa pagrekluta sa Partido pinaagi sa pagdapat sa prinsipyong mapangahasong magpalapad**

nga dili tugutang dunay makalighot nga bisan usa ka dili masaligan. Walay kaka-poy natong panguluhan ang pang-ideo-lohiyang konsolidasyon. Ilatid nato ang mga kongkretong plano aron makab-ot ang mga target sa pagkumpleto sa tulo ka ang-ang nga kurso sa Partido. Kinahanglang magbansay kita og nagkadaghang mga kadre sa Partido ug pag-promote sa mga batan-ong mga kadre pinaagi sa mga kumprehensibong programa sa edukasyon ug pagbansay.

Padayon kitang magdeploy og nagkadaghang ihap sa mga kadre sa Partido gikan sa hut-ong mamumuo ug batan-

ong intelektwal gikan sa urban ngadto sa Bagong Hukbong Bayan aron mag-alagad isip mga Pulang kumander ug mga upisyal sa pulitika sa padayong nagkadaghang mga platun ug kumpanyang gerilya. Ang mga aktibista nga ginalutos ug gigukod sa militar ug kapulisan mahimong modanogop sa NPA alang sa ilang seguridad.

**Nagpakanaug og instruksyon ang Komite Sentral sa tanang mga nangulong komite sa pagplano sa pagsaulog sa umaabot nga ika-50 nga anibersaryo sa Partido sa tuig 2018.**

Gahinan nato og luna ang pag-ila sa tanang mga bayani ug martir sa Partido ug rebolusyong Pilipino.

Ilunsad nato ang kampanyang pagtuon alang sa subling pagpalig-on sa atong paggunit sa Marxismo- Leninismo-Maois-

mo. Pinaagi sa paggunit sa pagkakarong kusog ug natigom nga mga kadaugan, ug sa pagpahimulos sa obhetibong pang-sulod ug internasyonal nga kahimtang, tinong mapapasas sa Partido ang iyang pagtubo ug pagkab-ot sa mas dagkung kadaugan sa umaabot nga mga tuig. ✪

**Ibagsak ang pasistang rehimeng US-Duterte!**

**Ibagsak ang imperyalismo, pyudalismo ug burukrata kapitalismo!**

**Moasdang sa dalan sa demokratikong rebolusyon sa katawhan!**

**Ipahimugso ang sosyalistang kaugmaon ug ang ultimong tumong nga komunismo! Mabuhi ang Partido Komunista ng Pilipinas!**

**Mabuhi ang katawhang Pilipino!**



**ka tuig nga pag-alagad sa katawhang Pilipino**

Pagsaulog sa  
ika-200 ka tuig  
sa adlawng  
natawhan ni  
Karl Marx



# Si Propesor JoMa kabahin sa mapadayunong gahum ug kalagsik sa Marxismo

Sa ika-200 nga anibersaryo sa adlawng natawhan ni Karl Marx niadtong Mayo, gipahayag ni Prof. Jose Maria Sison nga ang pinakamaayong paagi aron isaulog kini mao ang pagtuon sa iyang mga teoretikal nga buhat ug ang kamahinungdanan sa iyang mga rebolusyonaryong pagtulun-an sa kasaysayan ug kasamtangang katilingbanong kahimtang. Kinutlo ang mosunod sa iyang paha-yag atol sa selebrasyon.

## Marxismo isip Teorya sa Proletaryong Rebolusyon

Gamit ang 3 ka pinakaabanteng pasikaran sa kahibalo sa iyang panahon (materyalistang pilosopiya, pulitikanhong ekonomiya ug katilingbanong syensya), gipalambo ni Marx ang teorya sa proletaryong rebolusyon sa taas nga ang-ang sa paglambo sa katilingban.

1. Gidapat ni Marx ang diyalektikong materyalismo sa kasaysayan sa katilingban ug gitibuok ang istorikong materyalismo aron ihulagway ang transpormasyon sa usa ka tipo sa katilingban ngadto sa mas taas nga tipo pinaagi sa panagbangi sa hut-ong ug sa kontradiksyon sulod sa moda sa produksyon ug sa super-istruktura ug tali sa duha. Sa maong paagi, iyang gibaybay ang paglambo sa katilingban gikan primitibo komunal, ulipon, pyudal, kapitalista, sosyalista hangtud komunista.
2. Gamit ang Marxistang diyalektika, gisulat ni Marx ang *Das Kapital*, ang komprehensibong kritika sa kapitalismo. Aron ihulagway ang pagpahimulos, iyang gitibuok ang teorya sa sobrang bili kun diin ang sobrang bili (walay bayad nga pamuo) mao mismo ang gigikanan sa industriyal nga ginansya, interes sa bangko ug abang sa yuta nga mitumaw sa proseso sa produksyon ug gihakop sa hut-ong kapitalista. Iyang gibaybay ang kapitalistang akumulasyon pinaagi sa kapitalistang kompetisyon, paspas nga pagdako sa gintang sa kapital alang sa kagamitan sa produksyon kun itandi sa suhol sa mamumuo, pag-ubos sa tantos sa tubo, krisis sa sobrang produksyon nga mosantop sa katilingbanong krisis ug ang paggamit sa pinansyang kapital sa kolonyal nga pagpanakop aron ipabilin ang industriyal nga kapitalistang

ekonomiya.

3. Sa iyang pagtuon sa rebolusyonang Pranses, natuki ni Marx ang serye sa mga panagbangi sa hut-ong sa kasaysayan isip hinungdan sa pagbag-o sa katilingban. Gihatagan niya og dakung importansya ang makihut-ong nga panagbangi sa proletaryado isip yawe sa demokratikong pakigbisog sa masa alang sa sosyalismo—ang teorya sa siyentipikong sosyalismo. Gipatin-aw kini ni Marx ug ni Frederick Engels sa ilang sinulat nga *Manipesto sa Partido Komunista* (1848), ang dokumento nga nag-sinyas sa panag-alsa sa mga mamumuo ug mag-uuma sa tibuok Europe. Aktibo silang misalmot sa Unang Internasyunal, ang Kalibutanhong Asosasyon sa mga

**Ang mga proletaryong rebolusyonaryo ug tinuod nga Komunista ug Partido sa mga mamumuo nga ginagiyahan sa Marxismo-Leninismo-Maoismo mao ang pinakaandam ug pinaka-epektibo sa pag-asdang sa rebolusyonaryong paglihok batuk sa imperyalismo, rebisyunismo ug reaksyon.**

Mamumuo, kinsang mga membro nahimong kabahin sa Komuna sa Paris (1871), ang sayong tipo sa diktadurya sa proletaryado.

Hingpit nga gisud-ong ni Marx ang kasakto sa panawagan alang sa demokrasya sa mga mag-uuma, nga angayang pamunuan sa proletaryado apan gihatagan og konsiderasyon kun unsaon hikawan sa burgesya ang proletaryado og inisyatiba.

Bisan pa sa kamatayon ni Marx niadtong Marso 14, 1883 sa edad nga 64, paspas nga mikaylap ang impluwensya sa Marxistang teorya ug praktika sa pagpanguna ni Engels ug uban pa sa misunod nga Ikaduhang Internasyunal, hangtud nga sa ulahing dekada sa ika-19 siglo, nahimong nag-unang agos ang

Marxismo sa han-ay sa kalihukang mag-uuma sa Europa.

## Ang Leninismo isip Labawng Paglambo sa Marxismo

Giasdang, gidepensahan ug gipalambo ni Lenin ang Marxismo panahon sa modernong imperyalismo ug proletaryong rebolusyon. Tin-aw nga nakita ni Lenin nga ang monopolyo kapitalismo o imperyalismo ang pinakataas ug pinakaulahing yugto sa kapitalismo ug mao ang bisperas sa sosyalistang rebolusyon.

Dako ang iyang tampo sa pagpalambo sa diyalektikong materyalismo ug lig-ong nibarog batuk sa empirio-kritisismo ug sa lohikal nga positibistang panglantaw sa pilosopiya. Malampuson usab niyang gidepensahan ang proletaryong rebolusyon batuk sa mga Menshevik, mga Narodnik, anarkista, lunlon nga mga tsarista ug daghang uban pa.

Kun wala ang Marxismo ug ang misunod nga Leninismo, wala unta nagmadaugon ang mga Bolshevik sa Bantugang Sosyalistang Rebolusyonang Oktubre aron itukod ug palambuon ang usa ka gamhanang sosyalistang nasud, ang Unyong Sobyet, nga milangkob sa 1/6 sa katawhan sa tibuok kalibutan.

Kuyog si Joseph Stalin, ilang giasdang ang Ikatulong Internasyunal sa mga Komunista ug gikumbinse ang proletaryado ug linupigan sa kalibutan nga moalsa ug pildihon ang imperyalismo ug lokal nga mapahimuslanong hut-ong. Pag-abot sa 1956, gilangkoban na sa mga sosyalistang nasud ug mga nasud nga dunay kalihukang pag-lingkawas ang 1/3 sa katawhan sa tibuok kalibutan. Apan nailog sa mga modernong rebisyunista sama nila Khrushchov ug ang misunod kaniya nga si Brezhnev ang gahum sa Unyong Sobyet aron uk-ukon ang sosyalismo ug ipabalik ang kapitalismo.

## Maoismo isip Labaw pang Paglambo sa Marxismo-Leninismo

Pag-abot sa 1966, subay sa Marxismo-Leninismo, gilamid ni Mao ang teorya ug praktika sa mapadayunong rebolusyon ilalom sa diktadurya sa hut-ong proletaryado pinaagi sa Bantugang Proletaryong Rebolusyonang Pangkultura

## MUBONG KASAYSAYAN SA KINABUHI NI KARL MARX

**May 5, 1818.** Gipanganak si Karl Marx sa Trier, Germany

**1835 - 1841.** Nag-eskwela og Law sa Bonn University ug University of Berlin

**Hunyo 19, 1843.** Gikasal kang Jenny von Westphalen

**1844.** Nagkita si Marx ug si

Frederick Engels ug ilang gisulat ang

*Manuskrito sa Ekonomya ug Pilosopiya*

**Pebrero 21, 1848.** Gipagula ang *Manipesto sa Partido Komunista*

**Disyembre 1848.** Nagtudlo kabahin sa pulitikanhong ekonomya, mas ilado karon nga *Suholan, Pamuo ug Kapital*

**1859.** Gipagula ni Marx ang

*Kritiko sa Pulitikanhong Ekonomiya*

**Setyembre 28, 1864.** Nanguna

sa pagtukod sa International Working Men's Association o *Unang Internasyunal*

**Setyembre 1867.** Gipagula ang

unang edisyon sa *Bol. 1 sa Ang Kapital*

**Mayo 1871.** Gisulat ang *Ang Gera Sibil sa France* human sa Komuna sa Paris

**Mayo 5, 1875.** Gisulat ang

*Kritika sa Programang Gotha*

**Marso 14, 1883.** Namatay si Marx

ug gilubong sa Highgate Cemetery, London

aron suklan ang rebisyunismo, pugngan ang pagbalik sa kapitalismo ug konsolidahon ang sosyalismo.

Mibarog si Mao batuk sa bag-ong rebisyunismong Sobyet ug mga tigsunod niini nga mga Tsino. Bahin niini, ginadungog siya sa proletaryado ug katawhang Tsino sa iyang pagpamuno sa rebolusyonang Tsino ngadto sa kadaugan sa bag-ong demokratiko ug sosyalistang yugto hangtud gibali kini sa subersibong balud sa rebisyunismong Sobyet ug sa imperyalismong US human siya mamatay.

Mayor ang mga tampo ni Mao sa Marxista-Leninistang pilosopiya, pampulitikang ekonomiya ug katilingbanong syensya ug malampuson niyang napamunoan ang rebolusyonang Tsino. Bisan sa pagkakaran, tinahod si Mao isip nagtukod sa Republika sa Katawhan sa Tsina bisan sa kasamtangang nagapamuno sa Tsina kinsa nagsubay na sa nasyunalismo ug kapitalismo isip giya.

Daku ang impluwensya sa imperyalismong US ug modernong rebisyunismo sa Sobyet ngadto sa Tsina maong dili na kini usa ka sosyalista nga nasud. Ang teorya ug praktika sa mapadayunong rebolusyon ilalom sa diktadurya sa proletaryado nagtumong mga maseguro nga mapakyas sa proletaryado ug sa katawhan sa kalibutan ang imperyalismo aron makamartsa sila padulong sa kalibutanhong kadaugan sa sosyalismo. Apan napakyas kini sa pagbalik sa kapitalismo sa Tsina.

# OPERATION PACIFIC EAGLE - PHILIPPINES

*Bugti sa suporta sa US ngadto sa kurap ug kriminal nga paghari ni Duterte*



Gikan sa Ang Bayan

NIINING ENERO, human sa pila ka bulan nga sikretong mga operisyon, hingpit nang gipaila sa publiko ang bag-ong misyon sa US sa atong nasud, ang “Operation Pacific Eagle-Philippines.” Gipulihan niini ang Operation Enduring Freedom nga matud pa gitapos niadtong 2014 apan tuig 2015 na minghawa ang ilang mga tropa.

Sukad Hulyo niaging tuig, gikapital na sa mga senador sa US ang kontra-Moro nga gyera ni Duterte sa Marawi aron iduso ang pagtukod-balik og baseng operisyon ug hatagag pasangil ang pagpundo og lain-laing himang iggugubat, lakip ang mga eroplano ug drone, sa atong nasud.

Pinakamaayong kahimtang ang balaod militar ni Duterte batuk sa ginaingong “ISIS” sa Mindanao alang sa pagsulod balik sa tropang Amerikano ug sa permanenteng pagbase niini sa nasud bisan walay pinirmahang kasabutan. Labawng nihawan sa dalan niini ang pagkansela ni Duterte sa hinabing pang-kalinaw ug ang misunod nga pagdeklara sa CPP ug NPA isip mga “teroristang organisasyon.” Ang deklarasyon, kinsa misubay sa listahan sa US State Department sa mga langyawng teroristang organisasyon, nagpakusog sa pag-angkon ni Duterte og badyet gikan sa *overseas contingency operations* (OCO) sa US. Ang OCO ang dakong pondo sa Pentagon alang sa kontra-terorismo.


Sa sugod sa iyang termino, gipakita ni Duterte nga

**Sa pagsugod sa iyang termino, nagsaad si Duterte nga putlon na ang kontrol sa imperyalistang US sa atong nasud. Unsay hinungdan sa pagbag-o sa iyang baruganan karon?**

kuno “kwarta-kwarta lang” ang iyang pakiglabig sa US. Nagsaad siyang hatagan ang AFP og bag-ong mga himang militar ug nagpalimos sa China ug Russia aron makapangutang alang sa modernisasyon sa iyang pwersa. Sa Pacific Eagle-Philippines, mas daghan pa siyang madawat—ang tino nga suporta ni US Pres. Donald Trump aron pundohan ang iyang diktadurya.

Dugang pa, ginahatagan sa Operation Pacific Eagle-Philippines ang US og bentahe ngadto sa China, kinsa giila niini nga “estrategikong kakumpetensya” sa bag-ohay lang nga gipagula niining National Security Strategy (NSS). Pila ka tuig na karong gipaningkamotan sa US nga pitolon ang China pinaagi sa pagdeploy og mga tropa ug barkong-de-gyera, lakip ang pagpundo og mga himang iggugubat, sa rehiyon. Mao kini ang tumong sa “tuyok ngadto sa Asia” sa milabayng rehimen ni Obama.

Ilalom ni Trump, padayong gigamit sa US ang tumo-tumong hulga sa Democratic People's Republic of Korea (DPRK) isip pasangil aron “palambuon”



ang mas dakung missile defense system sa US.

Lakip niini ang pagposisyon sa 3 ka X-band radar system ug mga Terminal High Altitude Area Defense (THAAD) system sa rehiyon, apil ang paghimo og 10 ka mga bag-ong anti-ballistic missile capable warship.

Niadtong 2012, nangita og lokasyon ang mga opisyal sa depensa sa US

alang sa ikatulong X-band radar system sa Asia, ug gikatahong adunay nakit-an sa dagat sa Saranggani.

Sugod 2015, mokabat sa 20 ka mga off-shore radar system ang natukod sa Sulu ug Celebes Sea, ug gidugangan pa og 4 sa dagat sa Palawan, duol sa Scarborough Shoal. Sa susamang tuig, usa ka “national coast watch center” nga gitukod sa Amerikanong kompanya nga Raytheon ang nakumpleto gamit ang \$20 milyon nga pundo gikan sa US.

Padayon usab nga ginagamit ni Trump ang karang kontra-terorismo nga pagarpar aron magpadala og mga tropa ug ekwipo. Sa Pilipinas, gipabilin sa US ang 50 ka mga ispesyal nga pwersang pang-operisyon, nga ginaingong pinakadako nga kontra-terorismong pwersa sa Pacific, sulod sa dul-an 15 na ka tuig. Gibawi ang Operation Enduring Freedom human sa nabulilyasong “kontra-teroristang” reyd batuk kang Malaysian Zulkifli bin Hir (alyas Marwan) sa Mamasapano, Maguindanao. Nahitabo na usab ang usa pa ka nabulilyasong reyd sa lider sa Abu Sayyaf nga si Isnilon Hapilon aron ihusto ang “sayop” nga pagpakunhod sa mga ispesyal nga operisyon sa US sa Pilipinas. Gisaad sa Pentagon nga ang Operation Pacific Eagle mahimong mas daku ug mas makaylapon. ★

Kinutlo gikan sa Ang Bayan, Enero 21, 2018

Matud pa ni Lenin, ang Imperyalismo nangahulogan og kanunayng pagpangandam alang sa gubat. Maong alang sa mga imperyalista ug kapitalistang nasud sa tibuok kalibutan, mas importante ang bala ug bomba kaysa pagkaon ug uban pang serbisyo-sosyal!

## IMPERYALISMONG US ang adunay pinakadakong badyet-militar sa tibuok kalibutan

- |                            |                             |
|----------------------------|-----------------------------|
| 1 US • \$ 611 B            | 6 FRANCE • \$55.7 B         |
| 2 CHINA • \$ 215 B         | 7 UNITED KINGDOM • \$48.3 B |
| 3 RUSSIA • \$ 69.2 B       | 8 JAPAN • \$46.1 B          |
| 4 SAUDI ARABIA • \$ 63.7 B | 9 GERMANY • \$41.1 B        |
| 5 INDIA • \$ 55.9 B        | 10 SOUTH KOREA • \$36.8 B   |



Datus gikan sa Stockholm International Peace Research Institute (SIPRI)

Kalibutanhong gasto sa depensa (2016): **\$1.69 trilyon**



Dibuho ni Niko Estorya ni Kalai

## BAG-ONG AMO

UY, PART! KABALITA NA KA NGA DUNA DAW BAG-ONG AMO TONG ITOY SA INYONG SILANGAN?

HAHA! LAGI, GRABENG KAMRAS-KAMRAS INTAWON SA ITOY NGADTO SA INSIK!

PERO, PART. SA PAGKA TINUOD, KADTONG PUTI GIHAPON GYUD ANG TINUOD NIYANG AMO! WA MAN GYUD TO NIUNDANG OG SUNOD-SUNOD SA PUTI, BISAN PA GRABENG LAWOG NA SA INSIK NIYA!

SIYA BAYA GIHAPON GIHAPON SA TANANG NEGOSYO SA PUTI DINHI SA ATONG BARANGAY. DI TO MOBIYA SA PUTI KAY HADLOK TO PAHAWAON SA IYANG PWESTO.

SAKTO PUD NO? GAMHANAN BAYA TONG PUTI DINHI SA ATONG BARANGAY. DAGHAN TO OG LAING ITOY NGA BINUHI DIRI.

UG, PART. MURAG HINAY-HINAY TAG SIBAT ANI. MAMAAK DAW BAYA NA OG TAMBAY. DILIKADO TA.

AGUY.

NIXO JULY 2018

# Ang yaweng sumpay

ni Cris H. Enriquez

**Pakighinabi sa kadreng masa nga si Kas Melecio kabahin sa kalihukang masa nga ilang gilunsad taliwala sa detatsment sa kaaway sa ilang baryo.**

*Padayong palas-anon sa mga masa sa kabukiran ang taas kaayo nga singil sa post-harvest nga mga serbisyo sama sa galingan.*

**Pasabilis! (PB):** *Kongrats, Kas Melecio! Una sa tanan, pwede nimong mahulagway ang kadaugan nga nakabot sa mga masa sa inyong baryo?*

**Kas Melecio (KM):** Human sa gipahigayong kalmas, mikunhod og 28% ang singil sa galing sa mais, 58% sa singil sa galing sa kape ug 50% sa singil sa galing sa humay. Napapirma nato ang tag-iya sa galingan og kasabutan, lakip ang probisyon nga konsultahon usa niya ang mga mag-uuma ayha siya magpa-taas og singil. Mikaylap usab sa ubang mga baryo ang maong kadaugan.

**PB:** *Sa ato pa, nakabenepisyo usab ang ubang mga baryo tungod sa kalmas?*

**KM:** Aw, oo. Sa pagkakaran, pito (7) ka galingan na sulod sa 5 ka magkakanit nga baryo ang nagpaubos sa ilang singil sa galing. Daghan niining mga galingan ang boluntaryong nagpakunhod sa ilang singil tungod nahadlok nga kalmason sa mga tawo! Buot pasabot, sa taas nga panahon, daku gyud kaayo ang ilang ginansya kay kaya ra diay nilang ipakunhod ang singil nga dili sila malugi.

**PB:** *Pila tanan ang inyong napalihok, Tay? Giunsa ninyo paglunsad ang kalmas?*

**KM:** Kapin 500 ka masa ang atong napalihok. Giatubang nato ang komersyante didto mismo sa iyang galingan nga duol sa detatsment sa kaaway.

**PB:** *Kadaugan gyud alang sa mga mag-uuma! Unsa diay ang kahimtang sa negosyo sa galingan ug kinatibuk-ang kahimtang sa mga masa sa wala pa ang kalmas?*

**KM:** Kaniadto, ang komersyante nga gikalmas limpyong nagakita og kapin P176,000 sa iyang negosyo sa galingan matag bulan. Halos 244% kini sa iyang gasto nga kapin-kon-kulang P72,000. Monopolyo usab niya ang negosyo tungod walay laing galingan sa baryo.

Dugay sab wala nabalikan kini nga baryo sa mga kauban tungod taas nga panahon nagpundo dinhi ang kaaway ug naglunsad og Peace and Development Outreach Program (PDOP). Naglisod sa sugod ang mga kauban tungod medyo hadlok pa ang mga masa ug dunay pag-alanganin sa matag usa bunga sa kadaot sa PDOP. Duna pud mga detatsment sa kaaway sa sentro sa baryo ug bisan sa ubang kanit nga mga baryo.

**PB:** *Giunsa ninyo pagpatigbabaw niini nga kahimtang?*

**KM:** Lahi gyud ang epekto kun matuki nato ang interes sa masa. Mas dasig ang ilang paglihok. Sa among kaso, midulot gyud sa masa ang panawagan sa pagpakunhod sa singil sa galingan tungod direkta kining naga-apekto sa among panginabuhian. Bisan ang presensya sa kaaway dili dakung babag aron hiusahon ug palihukon ang masa.

**PB:** *Unsay nahimong epekto sa pagpalapad ug pagpalalom sa organisasyong masa ug sa kinatibuk-ang rebolusyonaryong gimbuhaton sa inyong mga baryo human sa maong kalmas?*

**KM:** Tungod sa kalmas, napabarog nato ang mga HOM ug KTO sa manakanit nga mga baryo. Sa mga baryo nga walay presensya sa kaaway, napabarog nato ang mga Komiteng Rebolusyonaryo sa Baryo (KRB) isip pagpangandam sa pagtukod sa Komiteng Rebolusyonaryo sa Munisipyo (KRM).

Paspas pud nga mitumaw ang mga aktibong masa nga atong girekluta isip membro sa Partido.

Ubay-ubay sab ang mga masa nga napasampa sa Hukbo. Gani, samtang ania ang mga kauban sa among erya,

natukod ang ikatulong platun sa Hukbo.

Napamatud-ang lig-on ang mga natukod nga organisasyon dihang pila ka semana human sa kalmas, naglunsad og dakong operisyon ang kaaway ug adunay nahitabong engkwentro tali sa mga kauban.

Gipanalipdan sa masa ang atong Hukbo ug wala gyud sila napahawa sa erya.


**PB:** *Unsa ang pagtulun-an nga inyong nakutlo sa moang kampanya, Kas?*

**KM:** Matud pa sa mga kauban, ang pagpalihok sa masa alang sa ilang maki-hut-ong nga interes mao ang yaweng sumpay diha sa pagpalig-on sa baruganan sa masa dili lang sa pag-atubang sa kaaway sa hut-ong apan bisan sa kaaway nga armado.

Sa ingon, komprehensibong naga-asdang ang tanang rebolusyonaryong gimbuhaton.

**PB:** *Unsay sunod ninyong mga plano, Kas Melecio?*

**KM:** Nagkahiusa ang mga masa nga mangandam alang sa sunod nga bahin sa programa sa among agreb—ang isyu sa resikada sa kopras. ★



**Aron lig-ong mapabarog ang atong rebolusyonaryong base ug makalunsad og kaylap ug sunson nga gerilyang pakiggubat...**

## AGRARYONG REBOLUSYON

**... ang yaweng sumpay sa atong pakigbisog dinhi sa kabukiran. Tun-an ang kahimtang sa masa ug i-asdang ang mga kampanya subay sa Rebolusyonaryong Giya sa Reporma sa Yuta!**



# Salig ug sandig, kas!

ni Eli Mutya

**“Maayong buntag kaninyong tanan!”**

Daw nakuhaan og tunok ang dughan ni Nay Cely dihang nadungog ang pag-sugod sa programa sa daku nga *gym* tapad sa detatsment sa kaaway. Nagbaktas pa sila padulong sa benyu sa kalihukang masa nga ipahigayon karong adlaw. Nabalaka siya nga dili madayon ang aktibidad tungod basin mahadlok ang masa nga duol ra kaayo sa detatsment ang negosasyon. Tumong sa kalmas nga konhuran ang usura sa pinansing sa panguma ug usbawan ang suholan sa mga mamumuong panguma dinhing dapit sa ilang munisipyo.

Iyang gihinumdom ang bayloanay sa mga punto sa pipila sa mga gilamid nga negosyador sa ilang asosasyon sa milabayng oras samtang nagbaktas.

“Dili ta angayang mahadlok nga duol sa detatsment ang benyu sa atong kalmas. Dili man mga sundalo ang nag-suhol nato. Unsay labot nila sa atong kalihukan? Kung mobabag man sila, nagpakita lang na nga dapig gyud sila sa mga adunahan,” si Nong Jerson, usa sa gitahasan nga negosyador.

“Tuod. Pero tan-awa ning atong panon. Singkwenta ra ta kabuok gikan sa atong sityo. Basin walay mitambong nga taga-ubang barangay,” sal-ot ni Nay Maria. “Unsa kahag dili na lang usa nato idayon ning atong kalmas?”

“Nganong dili man nato idayon?” Namilog ang mata ni Datu Jose. “Nia na ang masa. Bisan 50 ra ta kabuok, kung hiusa ta, kaya natong atubangon ang mga komersyante. Salig ug sandig sa masa, kas!”

Sa ilang unahan, nagdagan pabalik kanila ang ganina pang nag-una nga anak ni Datu Jose. “Kadugay ninyo! Mag-sugod na ang programa. Perteng punoa sa *gym* sa kadaghan sa tawo! Pagdali!”

Ug ilang nadungog ang pasiunang pagtimbaya sa *emcee* sa ilang programa.

Kapin 500 ka mga mag-uuma ang nitambong sa aksyong masa nga pagkompronta sa 4 ka mga agalong yutaan ug komersyante sa ilang lungsod. Samtang nagdagan ang programa, nakita ni Nay Cely ang kasakto sa pagpangandam sa ilang asosasyon alang sa komprontasyon: gikan sa mga balasahon ug plaps nga gigamit sa pagsaysay sa mga kahimtang sa usura ug suholan dinhi nga bahin sa ilang munisipyo.

“Kun moutang ang usa ka mag-uuma og kwarta aron ipinans sa iyang panguma, ginapatongan kini matag bulan og gikan 28% ngadto sa 40% sa mga komersyante nga naa dinhi karon,” matud ni Nong Jerson, samtang gitudlo ang plaps diin nasulat ang tala sa tinibuok nga *case study* nga ilang giandam.

Pagpadayon niya, “Samot na kun

utangon ang mga *farm input* sama sa abono ug medisina. Halos 50% ang inyong ginapatong. Nganong patongan man og labihan ka taas? Sigurado man mo sa pagbayad kay wala pa gani nabalanse sa amo ang abot, ginakuha na ninyo daan ang bayad sa utang!”

**“Ang hangyo lang namo, dili mi malubong sa utang tungod sa dako kaayo nga porsyento ug dili usab bugtian og labihan ka ubos nga suholan ang usahay sobra 8 ka oras namong hago sa pagtrabaho.”**

“Mahal na gani kaayo ang sako nga P18 kun inyong ibaligya, inyo pang himuong P25 kun utangan. Hain man ang hustisya niana?” kalit nga sal-ot sa wala na gyud kaantos nga si Nay Maria.

Nakapahiyom si Nay Cely. Wala na gyud lusot ning mga hakog! Tungod sa kataas sa diskusyon sa usura, halos 2 ka oras na lang ang naghin sa paghisgot sa suholan. Hinuon, huna-huna ni Nay Cely, dili na lisod ang suholan. Igo na lang namo iduso ang daan nang nasabotan.

“Human kita nagkasinabot niadtong milabayng tuig kabahin sa usbaw sa suholan sa mga ting-hornal, may duha o tulo ka bulan nga nituman kamo sa kahiusahan. Apan paglabay sa usa ka kraping, wala na ninyo gipatrabaho ang mga tinghorna nga nagduso sa saktong suhol. Gani, inyong gipugos kadtong utangan kaninyo nga modawat na lang og mas ubos nga suholan. Hangtud kadugayan, nibalik na usab sa karaang kantidad ang suholan,” kalmadong sagsay ni Nong Mario, ang tsirman sa asosasyon sa pikas baryo. Siya ang na-asayn nga mohisgot kabahin sa pagpa-usbaw sa suholan. Sa kaulaw, duko-duko lang ang mga agalon-komersyante.

Si Datu Jose ang ulahing namulong. Iyang gitibuok ang gidagan ug gipalig-on ang mga demanda sa mag-uuma. “Ang hangyo lang namo, dili mi malubong sa utang tungod sa dako kaayo nga porsyento ug dili usab bugtian og labihan ka ubos nga suholan ang usahay sobra 8 ka oras namong hago sa pagtrabaho.”

**Daug!**

Human sa hapit 8 ka oras nga bayloanay og punto, naduso sa mga mag-uuma nga dili mosubra sa 20% matag kraping ang interes sa pautang nga kwarta ug dili mosubra sa 20% ang patong sa giutang nga mga *farm input*. Gikasabotan usab nga maghatag ngadto sa mga mag-uuma og detalyado nga resibo ug kopya sa balanse sa utang. Subli usab nga gipalig-on ang daang kasabotan nga dili moubos sa P200 matag adlaw ang suholan sa mga mamumuong panguma, may libheng kaon man o wala.

Pila ka metros gikan sa benyu, igo ra nitan-aw ang mga kaaway nga nigawas sa ilang detatsment. Pipila kanila nagpahiyom sa gidagan sa komprontasyon. “Syempre! Mga mag-uumang utangan pud tong kadaghanan sa ila. Sigurado nalipay to kay lampos ang kalmas,” pasiaw ni Datu Jose. ★

**TALA SA NAGTUNHAY NGA USURA SA MGA FARM INPUT SA WALA PA ANG KALMAS**

Abono	Presyo kun paliton	Presyo kun Utangan	Kantidad sa Patong	Porsyento sa Patong
Urea/sako	P862.5	P1,225	P362.5	42%
21/sako	P383.33	P583.33	P200	52%
14-14/sako	P860	P1,200	P340	40%
<b>Medisina</b>				
Ground Plus (1gal)	P1,175	P1,700	P525	45%
24D (1 litro)	P317.5	P545	P227.5	72%
Round-Up (1gal)	P1,226.66	P1,593.33	P366.67	30%
Magnum	P310	P660	P350	113%

Ultimo sako nga tag-P18, mahimong P25 kun utangan sa masa! Mga walay puangod!



Abereyds nga mga presyo sa 4 ka agalon-komersyante nga gikompronta sa masa



#### HUGOT NGA GIBUGKOS SA YUTA UG INDUSTRIYA SA SAGING.

Mabayanihong gisuklan sa mga mamumuo sa Shin Sun Tropical Fruit Corp. (tu) niadtong Hunyo 2017 ang pagbungkag sa 66th IB sa ilang welga human sila gipanangtang sa trabaho sa plantasyon sa saging samtang maisugong giguba sa mga mag-uuma sa Madaum Agrarian Reform Beneficiaries Inc. (wala) niadtong Mayo 2017 ang mga kadenang dunay tunok atubangan sa hulga sa gatasan ka mga gwardiya sa Lapanday Foods Corp. kinsa pila ka dekadang nagkontrol sa ilang kayutaan.



BALIK-LANTAW  
2017



## Si Kaubang Mao ug ang iyang Imbestigasyon sa Kalihukang Mag-uuma sa Hunan

Human gimakmak sa mga reaksyunaryo ug maki-Tuong oportunistang sulod sa Partido ang militanteng kalihukang mag-uuma sa probinsya sa Hunan, Tsina niadtong unang kwarto sa 1927, nag-imbestiga si Kaubang Mao Zedong ug iyang gisulat kini nga taho aron depensahan ang kadaugan sa mga mag-uuma. Gimantala sa **Pasabilis!** kini nga serye nga kinutlo gikan sa maong makasaysayanong dokumento ug gilambigit kini sa daghang kasinatian sa maisugong pagdepensa sa mga mag-uuma sa ilang katungod sa yuta ug pagdemanda og ekonomikanhong alibyo sa lain-laing dapit sa atong rehiyon.

(Una sa Tulo ka Bahin nga Serye)

### Mag-organisa!

Nagsugod ang kalihukang mag-uuma sa probinsya sa Hunan sa tago nga dagway sa paglihok. Kasagaran sa mga mag-uuma nahimong gayd, iskawt ug kutay-paniktik sa Pulang hukbo. Inanay ug sinikreto silang nag-organisa hangtud sa ang kanhing kina-tibuk-ang ihap nga 300,000 hangtud 400,000 mibuot ngadto sa 2 ka milyon ka mga membro (nga may direktang impluwensya sa kapin 10 milyon ka molupyo sa Hunan) sulod lang sa usa ka tuig. Gidayeg ni Kaubang Mao Zedong ang lapad nga organisasyon sa mga mag-uuma kansang kusog “nagpahimugso og usa ka bantugang rebolusyon sa kabanikanhan, usa ka rebolusyon nga walay sama sa kasaysayan” niadtong panahona.

### Inanay nga Pagwagtang sa Gahum sa Agalong Yutaan

Ilalom sa panawagang “Tanang gahum alang sa mga asosasyon sa mga mag-uuma,” paspas ug kaylap nga gi-organisa ngadto sa mga asosasyon ang mga kabus nga mag-uuma, labaw na ang mga mamumuong panguma kinsa maoy naglangkob sa mayorya sa mga membro. Gipunting sa kalihukan sa mga asosasyon ang mga lokal nga agalong yutaan, mga mangtas nga nagharing hut-ong ug mga kriminal nga agalon.

Ilaha usab gitay-og ang mga karaang patriyarkal nga mga ideya ug institusyon ug gi-atake ang korap nga mga opisyal sa lungsod ug mga sayop nga binuhatan sa kabanikanhan. Nahimong labawng

gamhanan ang mga asosasyon nga bisan ang kanhing mga nagbatuk niini—mga adunahan ug hatungang mga mag-uuma ug bisan mga hatunga ug gagmayng mga agalong yutaan—naghandom nga mahimong membro niini.

Gimultahan sa mga asosasyon ang mga mangtas nga nagharing hut-ong ug mga agalong yutaan. Gipang-ihaw ang ilang mga hayop ug gibahin-bahin ang mga abot nga humay. Wala gipaminaw ang ilang mga estorya ug kritisismo ug gipang-aresto kadtong mga nagbabag sa asosasyon. Gipatuman sa mga asosasyon ang disiplinang sulod sa ilang langkob ug nawagtang ang dili maayong gawi sama sa sugal ug uban pang krimen. Gipang-aresto usab ang mga nagharing hut-ong nga wala miundang og gamit sa makadaot nga *opium* (ang kaylap nga illegal nga droga kaniadto sa Tsina).

### Kalihukan sa Tampalasan o Tig-asdang sa Rebolusyon?

Buot pasabot, gihugno sa mga mag-uuma ang “tam-is nga damgo” sa nagharing hut-ong ug gibag-o ang dagway sa katilingban. Tungod niini, nabantog ang mga asosasyon isip usa ka kusog nga pulitikanhong gahum sa kabukiran, kinsa ginadaot sa mga Koumintang (ang nagtunhay nga reaksyunaryong gobyerno kaniadto sa Tsina) ug bisan pipila sa mga membro sa Partido nga miingong “naghinobra” o “makahadlok” ang ginahimo sa mga mag-uuma.

Apan alang kang Mao, sayop kini nga panglantaw. Una, ang kamangtas sa nagharing-hutong sa gatasan ka katugan maoy mitukod sa mga mag-uuma

nga maghiosa ug pwersadong palagputon sila sa gahum. Ang pinakagrabeng silot nga gipahamtang sa mga asosasyon gihatag ngadto sa mga pinakamangtas usab nga adunahan kinsa naghimo og dakung krimen batuk sa katawhan.

Ikaduha, gipahinumdom ni Mao nga ang rebolusyon usa ka maduguong insurreksyon sa usa ka hut-ong aron hugnuon ang usa pa ka hut-ong. Matud niya, “ang usa ka rebolusyon dili usa ka kumbira, o pagsulat, o pagdrowing, o pagburda; dili kini mahimong pinino, hinay-hinay ug malumo, kalmado, minaayo, matinahuron, mapugnganon ug manggihatagon.”

Kung wala ang ilang kusganong pwersa, dili malumpag sa hut-ong mag-uuma ang halawum kaayo nga awtoridad sa mga agalong yutaan nga liboan ka tuig nang nagtunhay. Gikinahanglan nga ipabarog ang absolutong awtoridad sa mga mag-uuma sa kabukiran. Gikinahanglan nga bungkagon ang tibuok ga-

hum sa nagharing hut-ong, pulpogon sila paubos sa yuta ug ipabilin didto.

Alang kang Mao, kinahanglang suportahan sa tanang rebolusyonaryo ang militanteng kalihukan sa mga mag-uuma tungod ang pagbarog batuk niini mao ang pagbarog batuk sa rebolusyon.

Gipatin-aw usab ni Kaubang Mao ang panginahanglan sa pagsandig sa kusog sa kabus nga mga mag-uuma isip “bata kang pwersa sa pait nga pakigbisog sa kabukiran.” Dugang pa, absolutong gipanginahanglan nga ang kabus nga mga mag-uuma maoy mangulo sa mga asosasyon tungod sila ang pinaka-rebolusyonaryo.

Unsa ang mga kadaugan nga nakab-ot nga nagpabag-o sa katilingban sa Hunan ug giunsa kini paghimugso sa mga asosasyon sa mag-uuma? Sundi sa sunod nga isyu sa **Pasabilis!** ★





# Maayo pa ang saging, adunay puso...

**G**unit ang mikropono ug nagapamula sa kasuko, gihulagway sa usa ka mag-uuma nga benepisyaryo sa mini nga programang CARP ang kahakog sa kompanyang TADECO sa pagpangilog sa ilang yuta: “Maayo pa ang saging, adunay puso.”

Sa esensya, ang programang repormang agraryo angayang motubag sa duha ka nag-unang tumong: una, ang pagbalhin sa pagpanag-iya sa yuta gikan sa kamot sa mga agalong yutaan ngadto sa mga mag-uumang nagtikad ug, ikaduha, ang pagtabang sa mga mag-uuma nga himuong produktibo ang ilang kayutaan aron motubag sa panginahanglan sa ilang mga pamilya ug, sa ingon, magpabilin kanila ang hingpit nga pagpanag-iya sa yuta.

**Apan unsa ang kahimtang sa mga giingong “benepisyaryo” sa repormang agraryo sa reaksyunaryong gobyerno?**

**1** Human giilang “agrarian reform beneficiaries” ang mga mag-uuma, gitukod ang ilang agrarian reform beneficiaries organization (ARBO) aron mas sayon ug paspas silang ipailalom sa lain-laing iskema ug kasabutan nga pabor sa kapitalista ug agalong yutaan. Kadaghanan sa mga ARB wala na o wala nay direktang pagpanag-iya sa ilang yuta. Kasagarang hinungdan mao ang pagkalubong sa utang nga mosangpot sa pagbaligya sa katungod sa ilang yuta. Sa talagsaon kaayo nga kahimtang nga aduna pay limpyong kita, dili na kini makapaigo sa panginahanglan sa pamilya.

Ang Agrarian Reform Communities kon ARC usa ka disenyo sa reaksyunaryong gobyerno ug mga kapitalista nga hugpongong ang daghang mga kooperatiba sa ARB aron makabaton og bolyum og dinagko nga produksyon alang sa mas dako nga ginansya.

**2** Ang mga Agri-Ventures Agreement (AVA) isip instrumento sa pangilog og yuta. Kasagaran, adunay duha ka dagway sa AVAs sa rehiyon: ang lease o abang ug ang grower-ship nga mga kasabutan. Sa kinatibukan, ang lease nagpasabot nga pinaagi sa kooperatiba nga gitukod, abangan sa kompanya ang yuta sa mga ARB sa ubos kaayo nga kantidad matag tuig sulod sa 20 o 30 ka tuig. Ang ARB magpabiling mamumuong panguma sa mga plantasyon sa saging, pinya ug uban pang

eksport nga produkto.

Sa pikas bahin, ang grower-ship nagpasabot nga ang mga ARB, indibidwal man o kolektibo, mosuplay og produkto ngadto sa kompanya kinsa maoy adunay kontrol sa produksyon pinaagi sa farm input, kalidad sa produkto ug presyo sa palit. Sa duha ka kasagarang dagway sa AVA, pabor kaayo ngadto sa kompanya ang mga termino sa kasabutan tungod ang kompanya ang adunay hingpit nga kontrol sa produksyon, lakip ang presyo sa abot nga produkto. Sa unang mga tuig, maayo pa ang kahimtang sa mga ARB apan sa dili madugay, tinuig nang nagadaku ang ilang alkansi hangtud kadaghanan kanila mapugos nang ibaligya ang yuta tungod sa kadako sa utang ngadto sa kompanya.

**3** Ginapaneguro sa mga kompanya ug agalong yutaan nga malubong sa utang ang ARBs. Yaweng gipatuman sa mga kompanya sa plantasyon ang kemikal nga produksyon sa mga pang-eksport nga pananom aron ipaneguro ang ilang kontrol sa kayutaan sa ARBs. Pinaagi sa pagpautang sa mga kooperatiba sa ARB ilalom sa makabuktot nga mga kasabutan sa AVAs, malahutayong nagunitan sa mga kapitalista ug agalong yutaan ang ekonomikanhong kinabuhi sa ARBs.

**4** Human sa pid-an ka tuig ilalom sa AVA, ginaipit ang ARBs kinsa nagtrabaho isip mga harvester o packer sa mga packing plant sa sagingan aron padayong paabangan sa kompanya ang ilang yuta. **Nasiak ang mga mag-uuma sulod sa kooperatiba:** ang nagtugot o miboto nga YES, gipaboran ug padayong gipatrabaho sa kompanya samtang kadtong nagdumili o miboto nga NO, gipangantang sa trabaho ug gimanobra aron dili na direktang makatikad sa ilang kaugalingong yuta.

Kini ang nahitabo sa 259 ka ARBs sa WADECOR Employees Agrarian Reform Beneficiaries Association Inc. (WEARBAI) sa Tadeco Area sa Brgy. Minda, Carmen.



Gikan sa Facebook, kuha ni Nadja De Vera

## ■ Pipila ka kasayuran mahitungod sa kahimtang sa mga agrarian reform beneficiary kon ARBs

**5** Ang neoliberal nga mga palisiya nga ginapatuman sa reaksyunaryong gobyerno ug ginapahamtang sa mga kapitalistang nasud, labaw na sa imperyalistang US, naglansang sa atong ekonomiya nga agrikultural, atrasado ug import-dependent ug export-oriented. Sa kasamtangan, mokabat na sa 150,000 ektaryas sa rehiyon ang gihimong plantasyon alang sa lain-laing pang-eksport nga tanom ug padayon pa ang pag-eksport niini.

**6** Ginapakita sa kasinatian sa nakigbisog nga mga ARBOs nga ang Department of Agrarian Reform (DAR), kinsa gimandoan sa reaksyunaryong balaod nga ipatuman ang CARP, usa ka ahensya sa estado aron hatagan og ligal nga dagway ang pagpangilog og yuta sa mga kapitalista ug agalong yutaan. Nasinati kini sa ARBs sa Brgy. Sampaw ug Brgy. Gabuyan sa Kapitalong dihang gisalikway sa DAR Adjudication Board (DARAB) ang ilang katungod sa pagpanag-iya sa 91 ektaryas nga kayutaan niadtong 2014.

**7** Sa daghang mga kahimtang diin nangisog ang mga mag-uuma nga suklan ang ilang mga agalong yutaan o kompanya, mibarog ang mga reaksyunaryong korte batuk sa interes sa ARBs. Sa 12 ka kaso nga nadokumentado sa organisasyong ARB One Movement, usa ka kahugpungan sa mga ARBs sa rehiyon, walay bisan usa ka desisyon sa mga lokal nga korte ang midapig sa demanda sa mga mag-uuma nga maangkon balik ang ilang yuta. Sa mga talagsaong kahimtang nga napasaka ngadto sa Korte Suprema ang mga kaso ug nadaog ang mga mag-uuma sama sa kaso sa Checkered Agrarian Reform Beneficiaries Multi-Purpose Cooperative (CHARBEMPCO) sukad niadto

pang 2014, wala gipatuman sa mga ahensya sa reaksyunaryong gobyerno ang maong desisyon tungod sa manobra ug kontrol sa mga agalong yutaan.

**8** Ang mersenaryo ug pasistang kinaiya sa PNP ug AFP sa reaksyunaryong estado dayag nga nagatumaw panahon sa igting nga panagbangi sa interes tali sa mga mag-uumang nagtikad ug mga agalong yutaan nga adunay kontrol sa lapad nga kayutaan. Sama sa nahitabo sa mga 102 ka mga mag-uumang Moro sa Madaum, Tagum City, pwersado silang gipahawa sa 152.8 ektaryas nga kayutaan sa hapit 300 ka mga pulis niadtong Agosto 2014.

**9** Tungod sa lain-laing dagway sa pagpamig-ot, pagpanikas ug kamangtas sa mga kompanya ug kawalay suporta gikan sa reaksyunaryong gobyerno, nawad-an og paglaum ang mga ARBs ug pugos nga napahawa sa ilang yutang gitikad. Makaloolooy ang kahimtang sa liboan kanila nga nahimo na lang mga mala-proletaryado sa syudad ug lungsod ug nanginabuhi isip mga street sweeper, drayber, labandera o tindero.

**10** Ang panaghugpong sa ARBs alang sa tinuod nga repormang agraryo ug militanteng aksyong masa maoy yawe sa pagsulbad sa ilang alaot nga kahimtang sama sa malampusong kasinatian sa mga mag-uuma sa MARBAI sa Tagum City ug MAFAI sa Arakan, North Cotabato niadtong 2017. Angayang dili nila ilimita sa mga ligal nga paglihok ang ilang pakigbisog apan mai-nantusong idemanda nga malingkawas sa mapahimuslanong mga AVA, palig-unon ang ilang organisasyon isip tinuod nga kooperatiba sa produksyon ug iduso ang malahutayon ug organikong produksyon alang sa pagkaon. ★

## PEACE AND DEVELOPMENT TEAM SA AFP: Gipasubsub nga operisyong militar sa mga baryo

**GINGANLAN OG mga “peace and development team” (PDT) ang liboan ka pwersang militar nga gipakat sa Armed Forces of the Philippines (AFP) sa mga baryo sa lain-laing bahin sa nasud.**

Gisugdan kini ilalum sa Oplan Bayanihan ug gipadayon sa Oplan Kapayapaan sa rehimeng US-Duterte. Target niining pukanon ang Bagong Hukbong Bayan (BHB) ayha mahuman ang 2018.

Bunga niini, kapin 100 ka batalyon sa tropang pangkombat ang gibubo sa AFP sa tibuok nasud. Anaa sa Mindanao ang 65% niini, kung asa sobra 50% ang nakadeploy batok sa BHB. Matud mismo sa AFP, halos katunga usab sa ilang ₱195.4-bilyon nga badyet alang sa 2018 ang gigahin aron pondohan ang mga operisyong PDT.

Ilalom sa PDT, naglunsad og mga pakaarun-ingnong operisyong sibiko (medikal, isports, *community service*) sa mga baryo aron tabonan ang mga operisyong saywar, paniktik, kombat, pagpatay nga ala-Tokhang, “opensi-bang ligal” o paghandos og minugna

nga mga kasong kriminal batuk sa mga ginaspetsahang mga lider ug aktibistang masa, pagkontrol sa populasyon ug mga rekurso, pagbungkag ug pag-atake sa mga organisasyong masa, ug lain pang mga pasistang pagpanumpo ug pagpangabuso.

Pinaagi sa mga operisyong PDT, dinaghang mga molupyo ang gihikawan sa ilang mga demokratikong katungod ug kagawang sibil. Kaylap ang arbitraryong pagpang-aresto, pagpamig-ot, pugsanong pagpatrabaho, pagpagiya sa mga operisyong militar, pagpangrekut sa mga paramilitar ug CAFGU ug pagrekut sa mga gaway sa paniktik.

Daghan sa mga mag-uuma ang gidid-ang moadto sa ilang umahan ug mopalit og pagkaon ug panginahanglang lapas sa ginadikta sa mga sundalo. Kaylap usab ang mga kaso sa pagpanumpo sa pulos suspetsa o kapritso sa mga sundalong kasagaran nagkampo sa mga pampublikong lugar ug istruktura.

Labaw pang misamot ang susamang mga atake sa PDT ilalom sa balaod militar nga ginapahamtang sa Mindanao, kung asa nag-astang despotikong mga hari

ang mga sundalo sa eryang ilang ginatake. Kaylap usab kini sa mga gidudhang “lugar sa BHB” sa Luzon ug Visayas.

Angayang itaho, ibutyag, batukan ug tapuson ang ingon niining mga pa-

sistang maniobra sa estado batuk sa tibuok rebolusyonaryong pwersa ug nagkahiusang demokratikong sektor sa katilingban. ★

**Gikan sa Ang Bayan, Hulyo 7, 2018.**



**LABAWNG APEKTADO SA MILITARISASYON.** Mga Lumad nga inahan ug ilang mga bata gikan sa komunidad sa Talaingod, Davao del Norte ang labihang naapektohan tungod sa pagpundo sa mga tropa sa AFP sa mga komunidad. Niadtong Marso, subling namakwit ang hapit 400 ka mga Lumad ug mainiton silang gidawat sa mga mag-uuma sa Madaun Agrarian Reform Beneficiaries Association, Inc. sa Tagum City. Kabahin sila sa 404,654 ka masa sa tibuok Mindanao nga nagbakwit tungod sa nagkamangtas nga militarisasyon sa AFP sa kabukiran.

## Ang sugilanon ni Tatay nga miuli og pusil

**K**adali nga natugaw ang posting pagkabot nila Kas Arman gikan pagkuha og suplay. Na-alerto ang kauban kay gawas sa bugas ug bulad, naa na silay bitbit nga pusil pag-uli.

“Asa na gikan ang M16?” pangutana ni Kas Melbin, ang CO sa kumpanya.

Bisan gihangak pa, dako kaayo ang ngisi ni Kas Arman. “Kang Tay Yulo. Iya gyud gitago aron mauli sa ato.”

“Hala, kadto man ning pusil ni Kas Mando,” sal-ot sa iskwad lider nga si Kas Emil pagkakita sa pusil nga gunit sa CO. “Mao ning pusil nga abi nato nakuha sa kaaway human sa engkwentro didto sa pikas sityo. Giunsa pagkuha ni Tatay Yulo ini?”

“Si Tatay na lang mosaysay.

Ameysing kaayo iyang sugilanon!” dala katawa ni Kas Arman. Ug taud-taod, kuyog sa uban pang kauban nga nagkuha og suplay, miabot si Tay Yulo nga naglukdo og usa ka bulig nga kardaba.

Human sa kumustahay, giestorya na sa koman si Tay Yulo. Gihinumdom sa mga kauban ang nahitabong engkwentro tali nila ug sa tropa sa kaaway daplin sa sapa diin namartir si Kaubang Mando samtang nagpugong sa pag-abante sa kaaway. Samtang padayon ang pinusilay, nakuha pa

nila ang lawas sa kauban duol sa pangpang apan wala na nila makit-i ang pusil nga iyang sektor.

“Tulo ka bulan ang mila-

bay, miagi ko sa sapa ubos sa nahitabonan. Medyo hapon ug kilum-kilom na to pero naa koy nasiplatan sa tubig nga murag nalubong nga buts. Dihang akong gihikap, uy! Bat man diay sa pusil! Gihaw-

wan nako ang balas

sa iyang kilid ug mga bato nga nagpali-bot. Hinay-hinay nako siyang gibira. M16 gyud sya!” ngisi-ngisi si Tatay.

“Nagpangitngit usa ko ayha nibalik sa baryo. Gilimpyohan nako ug giputos og sako dayon gitago ilalom sa among balay.”

Dugay katingog ang mga kauban. Misal-ot si Kas Arman, “Subay sa oryentasyon, wala gyud mi nagpakita og laing tawo nga wala namo nailhan pagkuha namo sa suplay ganina. Maayo na lang, didto mi niagi sa balay nila Tay Yulo. Iya ming gikaway, naa daw siyay importante nga sikreto iingon.”

“Giingnan nako sila nga naa koy gitago nga gamit para sa inyo. Di ko sigurado kun sa inyo ba o sa kaaway pero kay pusil man, sa Hukbo gyud dapat to mopai-ningon. Hehe,” nagngising ingon sa masa.

“Kuyawa nimo, Tay, uy. Giunsa man nimo ni pagtago sulod sa unom ka bulan? Diba gipundohan mog kaaway dinhi?”

Human sa nahitabong engkwentro, gipundohan sa PDT sa kaaway ang ilang baryo. Sumala pa sa mga responsable sa baryo, ginaadlaw-adlaw sila og bahad sa kaaway nga dili na magpasulod og Hukbo sa baryo. Daghan ang gitapok ug giingnan nga nagsurender na sila nga mga membro sa organisasyon. Ang uban, labaw na mga bantan-on, gipagunit og pusil, gipiktyuran ug giingnan sila nga mga NPA kuno sila nga naghural.

“Napugos ra gyud tong mga silingan namo, uy. Wa gyud toy tuyo nga mosurender o unsa ba. Sa pulong-pulong

**“...Kun lig-on natong napundar ang pulitikanhong baruganan sa masa, makalaom gyud ta nga dili sila motraydor nato.”**

nga ilang gipatawag, gipangutana mi sa ilang labaw, ‘Kinsa’y gusto og kalinaw dinhi, taas ang kamot?’ Syempre, nitaas intawon mi og kamot. Ug gipiktyuran mi. Diay, mao na tong ilang gigamit nga pagpamatuod nga nagsurender kuno mi,” naglingo-lingo nga ingon sa masa.


“Wala gyud ka nalingla sa gihanyag nga kwarta sa kaaway, Tay? P30,000 pud baya daw ang masurender nga pusil,” pangutana ni Kas Melbin.

“Sus, unsaon ta man nang kantidad kun dili na ta makapamuyo og tarong diri sa bukid tungod nakasala na ta sa kalihukan ug sa masa? Ngano pud daw modapig ta anang mga tampalasan nga wa man nay kaayo gihatag diri sa ato?”

Human gimeryenda sa mga kauban ang dala ni Tay Yulo nga linung-ag nga saging, nananghid na ang masa nga mabalik sa komunidad. Samtang naglakaw palayo si Tay Yulo, gisulti ni Kas Arman ang iyang kaamgohan.

“Tinuod gyud diay, Bin, no? Kun lig-on natong napundar ang pulitikanhong baruganan sa masa, makalaom gyud ta nga dili sila motraydor nato.”

“Mao,” tubag ni Kas Melbin samtang gilantaw ang M16 ug naghuna-hunang kinahanglang limpyohan usa kini ayha ihatag sa ilang bag-ong sampa. ★



# Gera ni Duterte batuk Lumad, gitubag og kontra-atake sa BHB

**TALIWALA SA mersenaryong tanyag niini og “pilak” ug malinglahong kalamboan, samot pang gipamangtas ni GRP Pres. Rodrigo Duterte ang iyang todo-gyera batuk sa mga Lumad sa pagbubo niini og 17 ka batalyon sa AFP sa tibuok rehiyon.**

Kini matud pa ni Rigoberto Sanchez, tigpamaba sa Regional Operations Command sa BHB, samtang gibutyag nga niadtong Enero, apektado ang dili moubos sa 62 ka mga baryo ug komunidad sa mga Lumad ug mag-uuma nga gikon-sentrahan sa mga tropa sa AFP sa 10 ka munisipalidad sa rehiyon.

Taliwala niining todo-gyera batuk sa mga Lumad ug sa rebolusyonaryong kalihukan, padayong gipatuman sa NPA ang mga gerilyang taktika sa pakiggubat nga konsentrasyon, paglunsad og atritibo ug anihilatibong mga aksyon batuk sa kaaway ug

pagkatag sa pwersa aron likayan ang mga konsentradong atake sa AFP.

Niadtong Marso 22, igo sa operisyong atrisyon sa 2nd Pulang Bagani Company ang 7 ka nagsubidang sakyanan sa 19th IB sa Brgy. Manobo, Magpet diin 1 ang patay ug 2 ang samdan.

Sa Baguio District, Davao City, tulo ka hugna naigo sa mga atritibong aksyon sa 3rd Pulang Bagani Company ang 3rd IB sa Sityo Basicong ug Sityo Utan, Brgy. Tamayong diin dili moubos sa 6 ang patay sa kaaway gikan Pebrero 23 hangtud 26. Duha ka adlaw nga gibombahan ang komunidad sa mga Manobo samtang gisunog ang 2 ka balay sa masa sa Sityo Basicong.

## SI PROPEJOR JOMA... GIKAN SA P. 12

Human sa kadaugan niini sa Cold War batuk sa Unyong Sobyet nga hingpit nang nahimong rebisyunista, gipakaylap sa US ang panglantaw nga walay kamatayon ang kapitalismo, patay na ang sosyalismo ug dugang pang nagduso sa iyang neoliberal nga ekonomikanhong mga palisiya ug mga gyelang agresyon. Sa kasamtangan, ang kumpetisyon tali sa karaang mga kapitalistang gahum nga US ug European Union ngadto sa dagkung kapitalistang gahum nga Tsina ug Rusya nagresulta sa paspas ug sunson nga mga krisis sa kapitalistang sistema ug gyelang agresyon.

### Transisyon ngadto sa pagkusog sa kalibutanhong proletaryong rebolusyon

Ang tataw nga kaatbang sa ekonomiya sa US mao ang Tsina; ug ang Tsina ug Russia ang kaatbang niini sa

Sa Pres. Roxas, North Cotabato, tulo usab ang kumpirmadong patay human gipabuthan og *command-detonated explosives* sa mga Pulang mangggubat ilalom sa Mt. Apo Sub-Regional Command ang 15th IB sa Purok 8, Brgy. Greenhills niadtong Pebrero 24.

Naglunsad usab ang NPA Guerilla Front 56 og operisyong demolisyon, diin 5 ka membro sa 3rd IB ang patay sa Sityo Balaas, Brgy. Gumitan, Marilog District sa Davao City niadtong Pebrero 9.

Niadtong Pebrero 4, gipabothan og eksplosibo sa NPA Guerilla Front 55 ang

usa ka *patrol car* sa PNP, diin 2 ka pulis ang patay sa Sityo Opaw, Brgy. Palma Gil, Talaingod.

Sa mao gihapong adlaw, gipahamtangan og silot-kamatayon sa mga operatiba sa Davao-Bukidnon Sub-Regional Command ang mangtas nga lider sa CAFGU ug rekruter sa Alamara nga si

Banadjao Mampaundag ug iyang anak nga si Jhonard nga membro usab sa CAFGU.

Niadtong Enero 25, gipabuthan og *command-detonated explosive* sa 1st Pulang Bagani Battalion ang pwersa sa 16th IB sa Brgy. Mapula, Paquibato district, diin patay si 1st Lt. Jarren Jay Relota, CO sa Bravo Company, samtang samdan ang duha pa. Bag-o niini, gi-haras sa mga Pulang manggugubat ang usa ka platun sa 16th IB sa Brgy. Lumiad, diin samdan ang 2 ka pasistang tropa.

Sa iyang gyera batuk sa Lumad, tataw nga nahukasan si Duterte isip usa ka desperadong talawan nga walay laing ginabiktima kun dili ang mga kabus nga sibilyan. ★

hisgutanang militar sa kasamtangan kalibutan nga *multipolar* tungod sa panagbangi sa han-ay sa mga imperyalista. Sa pikas bahin, tungod sa paspas nga paggrabe sa kawad-on nga nasinati sa katawhan sa kalibutan tungod sa libe-ralismo ug gyelang agresyon, subling napukaw ang mga pwersang rebolusyonaryo sa han-ay sa mga proletaryado ug linupigan.

Matud ni Propesor Sison nga anaa kita sa yugto karon sa transisyon ngadto sa rebolusyonaryong balud batuk sa pagkaut-ot ug pagkadunot sa monopolyong kapitalismo sa pinansya. Subli kitang ginapalagsik sa gahum sa Marxismo ug sa abanteng paglambo niini sa kasaysayan ug sa kasamtangan kahimtang aron moaslang sa kalibutanhong proletaryong rebolusyon alang sa nasudnong kalingkawasan, demokrasya ug batuk sa imperyalismo ug tanang reaksyon. ★

## 10 KA NAG-UNANG... GIKAN SA P. 20

saysayan sa bantugang pakigbisog sa katawhang Ruso aron ipabarog ang pinaka-unang sosyalistang estado sa kalibutan. Gisundan kini sa usa ka kulturang programa diin nagpasundayag ang mga batan-ong aktibista gikan sa lain-laing organisasyon og mga presentasyon nga nagpakita sa kamahinungdanon ug kalambigitan sa Rebolusyon Oktubre diha sa demokratikong rebolusyon sa katawhang Pilipino. Napuno og bandila sa Partido Komunista ng Pilipinas ang tibuok benyu sa selebrasyon.

## 7 Taktikal nga opensiba sa sa Davao-Bukidnon National Highway

Taliwala sa balaod militar, lampos nga napahigayon sa 1st Pulang Bagani Battalion ang *mobile checkpoint* sa Davao-Bukidnon *national highway* niadtong Hulyo 19, 2017. Napakita sa mga Pulang manggugubat ang ilang katakus sa pagkasa og taktikal nga opensiba taliwala sa dakung deployment sa kaaway sa Southern Mindanao.

Atol sa opensiba, na-aresto ang usa ka operatiba sa CIDG, nasilotan ang usa ka membro sa CAFGU ug rekruter sa paramilitar nga Alamara ug naharang ang duha ka armado nga sakyanan sa Presidential Security Guard ni Duterte.

## 8 Pagpanabotahe sa AFP sa hinabing pangkalinaw

Sa Southern Mindanao, aktibong gisabotahe sa AFP ang hinabing pangkalinaw pinaagi sa pagdeploy niini og mga tropa sa mga hilit nga dapit sa rehiyon taliwala sa ilang gipakanaog nga *ceasefire*. Nabutyag kini dihang aktibong gidepensahan sa mga yunit sa BHB ang masa ug rebolusyonaryong base batuk sa mga tropa sa kaaway nga naglunsad og operisyong kombatan.

Walo ka kaaway ang patay dihang naengkwentro sa mga Pulang manggugubat ang 39th IB sa Sitio Lokatong, Brgy. Biangan kinsa pila ka semana nang naglunsad og operisyon sa sikbit nga mga baryo sa Makilala, Enero 21.

Pagka-Enero 26, malampusong nasanta sa yunit sa Mt. Apo Sub-Regional Command ang *strike operation* sa nagkomposit nga tropa sa 39th IB, CAFGU ug PNP Special Action Force sa Sitio Emilda, Brgy. Taguranao, Matalam, North Cotabato. Human sa 45-minutos nga panagsangka, 3 ka kaaway ang patay samtang luwas nga naka-widro ang mga Pulang mangggugubat.

Sa Manay, Davao Oriental, duha ka mag-uuma ang gipatay sa 67th IB human sa engkwentro sa ilang tropa ug sa mga Pulang manggugubat sa Comval-Davao East Coast Sub-Regional Command sa Brgy. Lambog

niadtong Pebrero 1. Niining mga engkwentro, gitagoan sa AFP ang ilang paglapas sa kaugalingong *ceasefire* nga tataw nga pagpanabotahe sa hinabing pangkalinaw.

## 9 General Strike sa mga mamumuo sa sagingan

Human mibuto ang welga sa Shin Sun Tropical Fruit Corp. tungod sa pagpanangtang sa mga opisyal ug membro sa ilang unyon niadtong Abril 6, 2017, sunod-sunod nang mikaylap ang lain-laing welga ug lihok-protesta sa mga mamumuo sa sagingan sa Compostela Valley. Kapin 2,000 ka mga mamumuo sulod sa 12 ka lain-laing planta ug plantasyon ang misalmot sa maong *general strike*.

Giprotesta sa Freshmax Workers Union, Abril 8, ang pila ka bulan nga wala pagpasweldo kanila sa kapitalista samtang gikundena sa Musahamat Workers Labor Union pagka-Abril 12 ang gihimong pagbungkag sa kompanya sa ilang unyon ilalom sa iskemang *gardening system*. Gisundan kini sa welga batuk sa sistemang “pakyawan” sa Maparat-Montevista Workers’ Union niadtong Abril 18.

Ilalom sa Banana Industry Growers and Workers against Sumifru (Bigwas) ug sa National Federation of Labor Unions - Kilusang Mayo Uno (NAFLU-KMU), naglunsad og protesta isip simpatya ang mga mamumuo sulod sa 8 ka unyon. Sukad 2013, halos matag tuig nang naglunsad og welga ug protesta ang mga mamumuo sa mga sagingan ug planta sa rehiyon.

## 10 8 ka POW, tawhanong gitratar sa BHB

Walo ka bihag sa gubat (*prisoner of war*) ang gi-aresto ug tawhanong gitratar sa lain-laing yunit sa BHB sa rehiyon. Ang duha ka CAFGU nga sila Rene Doller, 34, ug Carl Mark Nucos, 24, gibuhian sa Comval-Davao Gulf Sub-Regional Command niadtong Marso 24, 2017 samtang si PO1 Alfredo S. Basabica, Jr. sa PNP-Cateel gibuhian sa Comval-Davao East Coast Sub-Regional Operations Command niadtong Hulyo 28, 2017.

Niadtong Hulyo 19, atol sa gipahigayong *mobile checkpoint* sa 1st Pulang Bagani Battalion sa Davao City - Bukidnon Highway, giaresto si CIDG-Bukidnon Agent Rogelio Magno. Luwas siyang gibuhian pipila ka adlaw human siya gi-imbestigahan.

Si SPO2 George Rupinta gibuhian niadtong Setyembre 15 sa Lupon, Davao Oriental samtang si PO1 Bristol B. Catalan, Jr. girelis sa Mt. Apo Sub-Regional Command sa Magpet, North Cotabato niadtong Disyembre 4, 2017. Gibuhian si Police Inspector Menardo N. Cui niadtong Hulyo 27, 2018 human sa 7 ka bulan nga pagkadetini. ★

# 10 ka nag-unang panghitabo sa rehiyon niadtong 2017



6

## 1 5, 236 ektaryas nakuha balik sa mga mag-uuma

Daug ang kampanyang masa nga gipahigayon sa mga mag-uuma sa Madaum Agrarian Reform Beneficiaries Inc. (MARBAI) sa Tagum City ug sa Mailuminado Farmers Inc. (MAFAI) sa Arakan, North Cotabato diin mokabat 5,236 ektaryas nga yuta ang naangkon balik human sa pila ka dekadang paghikaw kanila sa Lapanday Foods Corp. ug sa Cotabato Foundation College of Science and Technology (CFCST).

Mahinumdomang 3 ka higayong gisulayan sa MARBAI ang pag-angkon balik sa ilang yuta ayha niadtong Mayo 18, 2017 dihang malampuson nilang nasulod ang ilang kayutaan taliwala sa gatusan ka mga armadong gwardiya sa kompanya.

Anaa karon sa ang-ang sa *validation* ang kayutaan sa MAFAI human napagawas ang *installation order* gikan Department of Agrarian Reform niadtong Disyembre 2016.

## 2 Indictment sa NDFP kang Noynoy Aquino III, etal human sa Kidapawan masaker

Atol sa paghinumdom sa unang tuig sa Kidapawan masaker, gipagula niadtong Abril 1, 2017 sa NDFP sa Southern Mindanao ang Indictment alang sa “mga krimen sa gubat, krimen batuk sa katawhan ug ubang seryosong paglapas sa kalibutanhong makitawhanong balaod ug kalibutanhong balaod alang sa tawhanong katungod” batuk ni kanhing GRP Pres. Benigno Aquino III, North Cotabato Gov. Emmylou Taliño-Mendoza, Kidapawan City Mayor Joseph Evangelista, North Cotabato Rep. Nancy Catamco ug uban pang sibilyang personalidad ug opisyal sa AFP ug PNP. Mangtas nga gipamusil ug gibungkag ang barikada sa mga Lumad ug mag-uuma kinsa nagprotesta sa pagpasagad sa reaksyunaryong gobyerno atubangan sa grabeng hulaw sa probinsya. Duha ka sibilyan ang patay, baynte-dos (22) ang grabehang samdan ug 79 ang gipreso human sa

maduguong dispersal sa kapin 6,000 ka mga sibilyan. Girekomenda sa Indictment ang paghatag og igong silot sa ginganlang mga akusado human sa ipahigayong pagtaral sa Hukumang Bayan.

## 3 CNL Regional ug National Congress

Niadtong Marso 13 hangtud 15, 2017, gilunsad sa Christians for National Liberation sa Southern Mindanao ang pinaka-una niing Rehiyunal nga Kongreso nga gitambongan sa 63 ka mga rebolusyonaryong obispo, pari, madre ug layko sa tibuok rehiyon.

Duha ka bulan ang milabay, gipahigayon usab sa usa ka gerilyang prente sa rehiyon ang ika-8 Nasudnong Kongreso sa CNL niadtong Mayo 15 hangtud 19. Gitambongan ang kongreso sa 65 ka membro sa CNL, kinsa 57 nila ang opisyal nga delegado, gikan sa 13 ka rehiyon sa tibuok nasud, lakip ang Northern Luzon, Central Luzon, Ilocos-Cordillera, Bicol, National Capital Region, Central Visayas, Negros, Panay, Southern Mindanao, Northeastern Mindanao, Far South Mindanao, Western Mindanao ug North Central Mindanao.

## 4 47 ka armas sakmit sa 2 ka disarma sa North Cotabato

Subling nahukasan ang ilegal nga binuhatan sa PNP ug AFP dihang gidis-

armahan sa BHB ang paramilitar niini sa Brgy. Mahongcog, Magpet niadtong Abril 9 ug sa iskalawag nga aset niini sa Brgy. Mateo, Kidapawan City niadtong Marso 15. Sa basbas sa 39th IB, gigamit sa kapitan sa Mahongcog ug sa iyang grupo ang mga armas alang sa kontra-insurhensiya ug pagpanghulga sa mga masa. Sa pikas bahin, ang mga armas nga nakumpiska gikan sa *confidential agent* nga si Reynaldo V. Dinampo sa Kidapawan City ginabaligya sa mga tag-as nga opisyal sa PNP ug CIDG alang sa ilang pangwarta ug uban pang ilegal nga aktibidad.

## 5 Serye sa taktikal nga opensiba sa 1st Pulang Bagani Battalion batuk sa Lapanday Foods Corp. sa Davao City

Gikalipay sa masang mag-uuma ug mamumuo ang gilunsad nga serye sa mga taktikal nga opensiba sa 1st Pulang Bagani Battalion batuk sa dakung agalong yutaan ug kumprador nga pa-

INSPIRASYON SA PAKIGBISOG. Gipasundayag sa mga aktibistang batan-on ang kamahinungdanon sa Rebolusyong Oktubre diha sa pakigbisog sa katawhang Pilipino batuk sa imperyalismo.

milyang Lorenzo niadtong Abril 29, 2017 sa lain-laing bahin sa Davao City. Sakmit ang 39 ka armas sa gilunsad nga mga opensiba aron papanubagon ang mga kompanya sa Lapanday nga gipanag-iyahan sa mga Lorenzo diha sa nagkadaghang salaod niini batuk sa mga pinahimuslang mamumuo ug sa mga mag-uuma ug Lumad nga giilogan niini og yuta.

## 6 Selebrasyon sa sentenaryo sa Rebolusyong Oktubre

Gitambongan sa gatusan ka masa ug mga aktibista ang pagsaulog sa mga progresibong organisasyon sa ika-100 ka tuig sa Rebolusyong Oktubre sa Davao City niadtong Oktubre 25 sa Holy Cross of Davao College Auditorium.

Unang bahin sa programa mao ang usa ka *forum* nga nagbalik-lantaw sa ka-


SUNDI SA P. 19

BALIK-LANTAW  
2017



Mga nakumpiskang armas sa North Cotabato. Tan-awa ang mga bidyo sama sa taktikal nga opensiba sa BHB sa Brgy. Mahongcog, Magpet sa [youtube.com](https://www.youtube.com) ug pangitaa ang channel nga [Pasabilis Southern Mindanao](https://www.facebook.com/pasabilis.southern.mindanao). Makita usab kini sa [facebook.com](https://www.facebook.com/pasabilis) sa page nga [@pasabilis](https://www.facebook.com/pasabilis).

4



2



3